

JON

Yesu Kilisi xolac niviha wê Jon kivuu ge

Kiyang nôn lam tu xomxo gê kibun

- ¹ Ilage vô buc taxlee ge, kiyang tyo dô. Kiyang tyo dô hixôn Anutu, dì ici va Anutu.
- ² Vô buc mugên ilage i dô hixôn Anutu,
- ³ dì Anutu nêl dì xomxo tyo tung susu vihati, dì susu ti o lam môp bangwe lêm. Nge, xomxo tyo tung susu vihati.
- ⁴ Dì ici va ge maviha kehe, dì maviha wê i vông ge linac vô xomxo mi he dô vac xêseac.
- ⁵ Xêseac wê i vông ge linac vac mapitoc, dì mapitoc o tiyi wê ob hivun xêseac tige xôn ge lêm.
- ⁶ Anutu vông xomxo ti lam lê nêbê Jon.
- ⁷ Jon lam nêl xêseac kehe kitong vô xomxo ên nêb he vihati i ngô kiyang wê i nêl ge dì vông i vin.
- ⁸ Ici va ge o xêseac tyo lêm. Nge, lam ên nêb ob nêl xêseac tige kitong vô xomxo.
- ⁹ Xêseac tige lop mi lam kibun ga, dì i xêseac nôn wê ob linac lec xomxo vihati ge.
- ¹⁰ Ici va tung susu kibun ga dì ici va lam dô kibun, lêc xomxo kibun ga, he o xovô i lêm.
- ¹¹ La vac ben vigwe kehe lê, lêc lie o kô i lec niviha lêm.

12 Lêc xomxo wê kô i lec nivîha dì vông i vin ge, od vông he tu Anutu nue.

13 Môp wê he tu Anutu nue ge o tiyi xocbê môp wê xomxo kibun ga kô nue ge lêm, dì kehe o yêp vac xovôên wê xomxo vông ge lêm. Nge, Anutu vaci vông he tu i nue.

14 Kiyang lam tu xomxo gê kibun ga dì i dô vac xe mahigun, om xe xê xêseac wê i vông ge. Xêseac tige Anutu vông vô nu tuc tibed, dì xêyaa vin lecên yuu kiyang nôn hivun i xôn.

15 Jon nêl xomxo tige kitong dì keac vyâ levac ên nêbê, “Xomxo tyo tiga, wê a nêl kiyang lec ilage ên a nêbê xomxo ngwe wê ob val timuên ge luu a vêl, ên buc wê a gên ma ge, xomxo tiga dô tax.”

16 Ici va tu vizid viyang viyang ge kehe om vông vizid tibeac vô il luu vêl.

17 Ilage Anutu nêl xolac vô Moses mi i nêl vô xomxo, lêc xêyaa vin lecên hixôn kiyang nôn, Yesu Kilisi vaci kô mi lam.

18 Xomxo ti o yê Anutu lec manôn lêm. Nu tuc tibed wê dô hixôn Ma Anutu ge wê lam nêl Anutu kehe kitong vô il.

*Jon Lipacêñ nêl i kehe kitong vô xomxo
(Matyu 3:1-12; Mak 1:2-8; Luk 3:2-18)*

19 Yuda levac wê dô Jelusalem ge vông xomxo wê mi si daa gee hixôn xomxo Livai ya la vô Jon di he la kinêg vô i ên nêbê, “Ông ge letya?”

20 Om Jon nêl i kehe kitong yêp seac vô he dì o yax vun lêm, om nêl i kitong ên nêbê i o Kilisi ti wê he dô bin ge lêm.

²¹ Om he kînêg ên nêbê, “Om ông letya? Ông tiyi xocbê plopet Ilaija, me?” Lêc Jon nêl vô he ên nêbê, “A o Ilaija lêm.” Om he kînêg nang ên nêbê, “Ông ge plopet ti wê xe mi dô bin ge, me?” Lêc Jon nêl ên nêbê, “A o plopet tige lêm.”

²² Om he kînêg tii vac ên nêbê, “Ông ge letya? Xe obêc mîlax nêl kiyang tibêna vô xomxo wê vông xe lam ge? Om ông nêl ông kehe kitong vô xe.”

²³ Om Jon nêl vô he tiyi xocbê kiyang wê plopet Aisaia kîvuu ilage bêga nêbê, “A ga xomxo ti wê tyuc vyâ levac vac vigwe mahigun pileva ên nêbê, ‘Xam viac Apumtau môp wê ob lam vac ge i yêp niviha.’ ”

²⁴ Xomxo tiguee, tibii Palisi vông he lam,

²⁵ mêd he kinêg vô Jon ên nêbê, “Ông nêl ên ông nêbê ông o Kilisi lêm, di nêl ên ông nêbê ông o Ilaija lêm, di nêl ên ông nêbê ông o plopet tige lêm, lêc bêna lêc ông lipac xomxo ya mia?”

²⁶ Om Jon nêl ên nêbê, “A lipac xomxo ya mia pileva, di xomxo ti val le vac xam mahigun lêc xam o xovô lêm.

²⁷ A lam tax di xomxo tige obêc val timuên, lêc a o nigviha tiyi wê aob piwelac yihi vêl ên su wê i vông ge lêm.”

²⁸ Jon nêl kiyang tige gê Betani wê yêp mia Jodan kehe vilu ganê. Vigwe tige wê Jon mi lipac xomxo vac ge.

*Yesu ge bwoc sipsip nu wê Anutu vông i lam
ge*

²⁹ Títige Jon yê wê Yesu val ge om nêl ên nêbê, “Xam wê lê, ge bwoc sipsip nu wê Anutu vông i lam kibun ên nêb i lam yib dì kitya xomxo nêni nipaên vêl ge.

³⁰ Ge xomxo wê a nêl kiyang lec ilage ên a nêbê, ‘A lam tax dì xomxo ti wê ob val timuén ge luu a vêl, ên buc wê a gên ma ge, xomxo tige dô tax.’

³¹ A gên o xê xomxo tige lêm, lêc a lam lipac xomxo ya mia, ên a nêb a ob nêl xomxo tige kitong vô xomxo Islel.”

³² Nang dêc Jon nêl kitong bêga ên nêbê, “A xê wê Myakilôhô Ngibua lam gê kisii ganê tiyi xocbê menac tucluu dì lam yêp lec Yesu kisii.

³³ A gên o xovô i lêm, lêc Anutu wê vông a lam lipac xomxo ya mia ge nêl vô a tax ên nêbê, ‘Ông obêc wê Myakilôhô Ngibua lop mi lam dô lec xomxo ti ge od ông xovô bê xomxo tige wê ob lipac xomxo ya Myakilôhô Ngibua.’

³⁴ A xê wê kiyang tige vô nôn lec ge om a nêl kitong bê xomxo tige, Anutu nu.”

Yesu keac xomxo yuudiyuu timu vô i vixa

³⁵ Vigwe vidiien titige Jon le hixôn i nue ngivihi yuu,

³⁶ lêc yê wê Yesu val ge, om nêl ên nêbê, “Wê lê, ge bwoc sipsip nu wê Anutu vông ge.”

³⁷ Nu ngivihi yuu ge ngô wê Jon nêl ge om la timu vô Yesu mi he la.

³⁸ Mêd Yesu pilepac i di yê wê yuu la vô i vixa ge om kinêg vô yuu ên nêbê, “Muu lam ên vatya?” Lêc yuu nêl ên nêbê, “Labai, ông dô vac

xumac tina?" Labai ge, kehe bêga nêbê xolac kehe.

³⁹ Om Yesu nêl vô yuu ên nêbê, "Muu lam wê lê." Om yuu la hixôn Yesu mi la yê xumac wê Yesu yêp vac ge. Ge hiyôv manôn yuudiyuu wê hucên ge om yuu dô hixôn Yesu di vigwe buc.

⁴⁰ Xomxo yuu wê ngô Jon via dî la hixôn Yesu ge, ngwe Andlu wê Saimon Pita li ge,

⁴¹ om Andlu la vô li Saimon dî nêl vô ên nêbê, "Xe xê Mesaia." Mesaia ge, lê ngwe nêbê Kilisi dî kehe bêga nêbê xomxo ti wê Anutu vông i lam ge.

⁴² Mêd Andlu kô Saimon mi yuu la vô Yesu, mêt Yesu yê Saimon dî nêl vô ên nêbê, "Ông ge Saimon wê Jon nu ge, lêc a ob nêl ông lêm bê Sipas." Lê Sipas ge, Glik via nêl bêga nêbê Pita, dî kehe bêga nêbê ngidax.

⁴³ Vigwe vidiien titige Yesu nêb ob la vigwe levac Galili om mila vô Pilip dî nêl vô ên nêbê, "Lam timu vô a."

⁴⁴ Pilip yon Andlu yuu Pita, yon ben kehe Betsaida.

⁴⁵ Mêd Pilip la myag Nataniel mi yêvô dî nêl vô ên nêbê, "Xomxo ti wê Moses kivuu kiyang lec mi i yêp vac kipihac xolac dî plopete kivuu kiyang lec hixôn ge, xe tulec i. Ge Yesu wê ma Josep vac vigwe Nasalet."

⁴⁶ Lêc Nataniel nêl ên nêbê, "Nôn niviha ti ob val tyip vac vigwe Nasalet lêm." Lêc Pilip nêl vô i ên nêbê, "Lam loc wê lê."

⁴⁷ Mêd Yesu yê wê Nataniel val vô i ge, om nêl lec i ên nêbê, "Wê, ge xomxo Islel niviha ti, wê kiyang kityooen ti o yêp vac i nilô ge lêm."

⁴⁸ Mêd Nataniel nêl vô Yesu ên nêbê, “Ông xovô a gê na?” Om Yesu nêl vô i ên nêbê, “Buc wê Pilip gên o keac ông lam lêm ge, ông le vac higuc kehe dì a xovô ông pyap.”

⁴⁹ Om Nataniel nêl ên nêbê, “Xolac kehe, ông ge Anutu nu. Ông tu xe Islel nêm xomxo levac.”

⁵⁰ Mêd Yesu nêl vô i ên nêbê, “Ông vông i vin ên wê a nêl vô ông ên a nêbê a xê ông le vac higuc kehe ge. Lêc tîmuêñ ông obêc wê susu ya obêc luu tiga vêl.”

⁵¹ Mêd Yesu nêl hixôn ên nêbê, “A nêl hixôn nôn vô xam bê tîmuêñ xam obêc wê, lêc lag puunê obêc tax dì angela wê Anutu vông ge ob lec mì la kisii dì lop mì lôm vô Xomxo Nu.”

2

Yesu pilepac mia i tiyi xocbê wain gê Kena

¹ Buc yuu la vêl dì buc wê vông yon ge xomxo vux ti ii vêx vac vigwe Kena wê yêp vac vigwe levac Galili ge, dì Yesu ta la dô hixôn.

² Dì he tyuc Yesu he nue ngivihi ên nêb he i lam dô hixôn.

³ Mêd xomxo num wain ma vêl, om Yesu ta la nêl vô Yesu ên nêbê, “He xen wain ma.”

⁴ Lêc Yesu nêl vô i ên nêbê, “Tag, le i nêl vô a lêm. Ge yêp vô a, ên buc wê a vông ge gên yêp.”

⁵ Mêd ta nêl vô nue yuac vîhati ên nêbê, “Xam vông i tiyi kiyang wê Yesu ob nêl vô xam ge.”

⁶ Dêg ngidax vîgê vilu dì sec ti le, wê he mi lipac vîgê hixôn susu ya vac tiyi môp wê Yuda mi vông ge. Dêg tige levac mabu om dêg toto ge

tiyi xocbê ob kîlê mia vac dêg nipwo kehe ti, me kehe ti dî vigê yuu mî too vac lêc i pup lec.

⁷ Mêd Yesu nêl vô nue yuac tigee ên nêbê, “Xam loc kîlê mia dî lam too vac dêg tigae dî i pup lec.” Om he la kîlê mia mî lam too vac dêg tigee vihati mî i pup lec.

⁸ Mêd Yesu nêl vô he ên nêbê, “Xam ka mia vac dêg nipwo dî kô mî loc vô xomxo levac ti wê viac yaên ge.” Om he ka dî kô mî la vô xomxo levac tyo.

⁹ Mia tige pilepac wain pyap mêt xomxo levac wê viac yaên ge num lê lêc o xovô kehe lêm. Nue yuac wê ka wain tige, he xovô, lêc xomxo levac wê viac yaên ge lungê, om keac xomxo ti wê ii vêx ge lam

¹⁰ dî nêl vô i ên nêbê, “Tibii vihati mi vông wain nyen vô xomxo tax mî he num. Dî he obêc num levac ge od ob kô wain wê nyen maên ge mî vông vô he timuên. Dî ông va lax wain nyen le, lêc dîvông i lam timuên tya ga.”

¹¹ Do levac tige Yesu vông gê Kena wê yêp vac vigwe levac Galili ge. Ge do taxlee wê Yesu vông ge, om hilung xêseac yuu xêkizêc wê i vông ge dî nue ngivihi yê dî vông i vin.

¹² Pyap dêc Yesu he tae lie hixôn nue ngivihi he xôn la Kapaneam dî la dô buc ya.

Yesu tii xomxo wê vông vitevac vac Anutu xumac ngibua ge la vêl

(Matyu 21:12-13; Mak 11:15-17; Luk 19:45-46)

¹³ Buc levac Pasova wê he Yuda ob xovô buc Isip ilage vô kwabo lec, om Yesu la Jelusalem

14 dì la vac Anutu xumac ngibua nilô, lêc yê wê xomxo ya kô bwoc kau yuu sipsip dì menac mi lam tung ên nêb tibii i kisuu dì vông i tu daa ge, dì yê wê xomxo ya dô dì vông mone luuma ge.

15 Om Yesu hôm yihi viên dì tii xomxo tigee hixôn bwoc kau yuu bwoc sipsip la vêl ên xumac ngibua, dì kipyax mone wê he vông i luuma ge hixôn tevol la sea,

16 di nêl vô he wê vông vitevac lec menac ge ên nêbê, “Xam kô xam susu gee mi loc vêl, dì le i lêc vông Mag xumac i tu xochê vigwe maket lêm.”

17 Mêd Yesu nue ngivihi xovô lec kiyang ti wê yêp vac kipihac xolac bêga ên nêbê, “A vông yuac xêkizêc ta ên a nêb ông xumac i yêp niviha.”

18 He Yuda yê môp wê Yesu vông ge om la nêl vô i ên nêbê, “Ông vông tibêge om ông ob vông do tina ên i nêl ông kitong vô xe?”

19 Yesu nêl vô he ên nêbê, “Xam obêc dii xumac ngibua tiga vêl ge od a ob lox vac i tiyi buc yon.”

20 Om he kinêg vô Yesu ên nêbê, “Xumac ngibua tiga, xomxo vông yuac lec tiyi xochê klismas kehe yuu dì vigê vilu dì sec ti (46), lêc ông nêl ên ông nêbê ông ob lox xumac tige vac i tiyi buc yon bed mê?”

21 Lêc xumac ngibua wê Yesu nêl lec ge, ge nêl lec ici va ninivi,

22 om buc tîmuén wê Anutu tipi vô Yesu kidi lec vac yibên ge, Yesu nue ngivihi xovô lec kiyang wê Yesu nêl lec xumac ngibua ge, om he vông i vin ên he nêbê kiyang wê Yesu nêl ge hixôn kiyang wê yêp vac xolac ge, ge kiyang nôn vîxôhilôg.

Yesu xovô xomxo vihati nilô

²³ Yesu dô Jelusalem vô buc Pasova wê he ob xovô buc Isip ilage, dì xomxo tibeac yê do levac wê i vông ge om he vông i vin.

²⁴ Lêc Yesu o vô ninya lehe vô he mi la vac kiyang wê he nêl ge kwa ngibi lêm,

²⁵ ên xovô he vihati pyap, dì o kinêg xomxo ngwe kehe vô xomxo ngwe lêm. Ên ici va xovô xomxo vihati nilô la tiyi pyap.

3

Yesu keac hixôn Nikodimas

¹ Xomxo ti dô lê nêbê Nikodimas. Nikodimas ge Palisi ti dì i xomxo levac wê he Yuda vông ge.

² Lêc la vô Yesu vô bucên dì nêl vô i ên nêbê, “Ông gexolac kehe, dì xe xovô ên xe nêbê Anutu vông ông lam. Ên do levac wê ông mi vông ge Anutu obêc dô hixôn ông lêm ge od ông obêc vông do levac tibêge lêm.”

³ Mêđ Yesu nêl vô i ên nêbê, “A nêl hixôn nôn vô ông bê xomxo ti obêc vô paha lec lêm ge od ob tu Anutu nu mi la dô vac i ben lêm.”

⁴ Lêc Nikodimas nêl vô i ên nêbê, “Xomxo wê vô levac pyap ge ob vô paha lec tibêna? Obêc lax vac ta nilô dì yubac i tii vac, me?”

⁵ Lêc Yesu nêl vô i ên nêbê, “A nêl hixôn nôn vô ông bê xomxo ti obêc vô paha lec ya mia hixôn Myakilôhô Ngibua lêm ge od ob tu Anutu nu mi la dô vac i ben lêm.

⁶ Xomxo kibun ga kô nue kibun ga, dom Myakilôhô Ngibua obêc vông xomxo vô paha lec ge, od vông he tu Anutu nue.

⁷ Kiyang wê a nêl ên a nêbê xam vô paha lec ge, le i lêc yetac ên kiyang tige lêm.

⁸ Lea la vac viigwe viyang viyang ge, lêc il ngô nididun pileva di kehe, il o xovô wê lam ge lêm, di ob loc tina ge, il lungên. Di môp wê Myakilôhô Ngibua vông xomxo vô paha lec ge tiyi bêge.”

⁹ Mêd Nikodimas luu i vya di kinêg ên nêbê, “Kiyang tige obêc vô nôn lec tibêna?”

¹⁰ Lêc Yesu nêl vô i ên nêbê, “Ông mi tixuu lime Islel ya xolac, lêc bêna lêc ông lungên kiyang tige kehe?

¹¹ A nêl hixôn nôn vô ông bê xe nêl kiyang wê xe xovô ge di xe nêl kitong lec susu wê xe mamnôn yê ge, lêc xam o vông i vin kiyang wê xe nêl ge lêm.

¹² A nêl kiyang tixuuên lec susu kibun ga, lêc xam o vông i vin lêm. Om a obêc nêl kiyang lec susu kisii ganê ge od xam ob xovô tibêna?

¹³ Xomxo ti o lec mi la lag puunê lêm. Xomxo Nu tibed wê lop mi lam gê lag puunê ge wê ob lec mi lax lag puunê tii vac nang.

¹⁴ Ilage Moses tul myel kinu lec xax vac viigwe mahigun

pileva. Om Xomxo Nu, tibii obêc tul lec xax tiyi bêge êno,

¹⁵ di xomxo vihati wê vông i vin i ge, he ob dô mavîha luta lêc luta.”

¹⁶ Anutu xo viigwe pisiv ên xomxo kibun ga vihati luu vêl om vông nu tuc tibed lam, ên nêb xomxo obêc vông i vin i ge od he obêc yib mi la vac nipaên lêm. Nge, he ob dô mavîha luta lêc luta.

¹⁷ Èn Anutu o vông nu tuc lam kibun ên nêb i lam vông myaviwen nipaên vô xomxo lêm. Nge, vông i lam ên nêb i lam hôm he lec.

¹⁸ Xomxo wê vông i vin Anutu nu ge kiyang ti o yêp vô he lêm. Lêc xomxo wê o vông i vin lêm ge he hilu nêb kiyang wê he ob yib mi la vac nipaên timuên ge, ên he o vông i vin Anutu nu tuc nôn tibed ge lêm.

¹⁹ Myaviwen wê xomxo ob kô ge, kehe bêga nêbê Yesu kô xêseac mi lam kibun ga lê, lêc xomxo xêyaa vin lec mapitoc di he xona ên xêseac, ên môt wê he vông ge nipaên.

²⁰ Xomxo vihati wê vông môt nipaên ge, he xona ên xêseac nêb he ob la vac lêm, ên he nêb xêseac ob hilung nipaên wê he vông ge lam le seac.

²¹ Di xomxo vihati wê vông môt bôbac ge he lam le vac xêseac, ên nêb xêseac i nêl he kitong bê he vông yuac ya xêkizêc wê Anutu vông ge.

Jon Lipacêñ nêl Yesu kehe kitong

²² Pyap dêc Yesu he nue ngivihi la vigwe levac Judia di la dô di lipac xomxo ya.

²³ Jon éno lipac xomxo gê Inon wê yêp kwabo vô Selim ge, ên mia levac yêp vac vigwe tige om xomxo la vô Jon di Jon lipac he,

²⁴ ên Helot gên o tung Jon la vac kalabuhu lêm.

²⁵ Jon nue ngivihi hixôn Yuda ti ngaenma lec môt wê mia lipacêñ ge.

²⁶ Om Jon nue ngivihi la vô Jon di nêl vô i ên nêbê, "Xolac kehe, xomxo ti wê dô hixôn ông ilage vô mia Jodan vilu ganê di ông nêl i kitong

ge, xomxo vihati la vô xomxo tyo dì i lipac he. Bêna lêc vông tibêge?”

²⁷ Mêd Jon nél lax vô he ên nêbê, “Anutu lag puunê obêc vông nôn ti vô xomxo ti lêm ge od o tiyi wê ob kô nôn ti ge lêm.

²⁸ Xacxam va ngô kiyang wê a nél vô xam ilage ên a nêbê, ‘A o Kîlisi ti wê il dô bin ge lêm, lêc Anutu vông a lam mug Kîlisi môp.’

²⁹ Xomxo ti obêc ii vêx ge od vêx tige ob tu ici va vinê, lêc li ngwe obêc dô dì ngô li ngwe wê ob kô vêx tige vyaa ge od xêyaa obêc vô niviha. Om gwêbaga, a tiyi xochê lig ngwe ge, ên a xêgyaa vô niviha yang ên Yesu.

³⁰ Om Yesu lê i vô levac dì a lêg i vô nipwo lec.”

³¹ Xomxo ti wê lam gê lag puunê ge luu xomxo vihati vêl. Ên xomxo kibun ga, kehe yêp gê kibun om ob nél kiyang lec susu kibun ga. Dom xomxo ti wê lam gê lag puunê ge nginoo susu vihati vêl.

³² Xomxo tige nél kiyang lec susu wê yê dì ngô pyap ge, lêc xomxo ti o ngô dì vông i vin kiyang wê nél ge lêm.

³³ Lêc xomxo wê ngô dì vông i vin kiyang wê i nél ge, vông vinên wê he vông ge nél kitong nêbê Anutu ge xomxo kiyang nôn.

³⁴ Xomxo ti wê Anutu vông i lam ge, nél Anutu kiyang, ên Anutu vông Myakîlôhô Ngîbua hîvun i xôn.

³⁵ Ma Anutu xêyaa vin lec nu tuc, om vông susu vihati vac i vigê.

³⁶ Xomxo ti obêc vông i vin Anutu nu ge od ob dô mavîha luta lêc luta, lêc xomxo ti obêc hîngoo nu tuc vyaa ge, od ob dô mavîha luta lêm,

ên xêyaa myavinê wê Anutu vông ge hivun i xôn pyap.

4

Yesu keac vô Samelia vêx ti

¹ He Palisi ngô kiyang wê nêb Yesu kô xomxo tibeac dì lipac he luu wê Jon lipac ge vêl.

² Yesu o lipac xomxo ti lêm. Nge, nue ngivihi môci lipac xomxo.

³ Mêd Yesu ngô wê he Palisi ngô kiyang tige, om sea vigwe levac Judia ên nêb ob lax mi la Galili,

⁴ mêt la vô môp Samelia,

⁵ dì mila vigwe ti lê nêbê Saika wê yêp vac vigwe levac Samelia ge. Vigwe tige yêp kwabo vô kibun ti wê Jekop vông vô nu Josep ilage.

⁶ Lôva ti wê Jekop yev ilage mi mia lua vac ge yêp vac vigwe tige om xomxo lam mi kilê. Yesu mila, lêc ni ma vêl lec môp dia wê lam ge om mila dô kwabo vô mia tige. Ge tiyi xocbê hiyôv tyip kitôn.

⁷⁻⁸ Yesu vaci mila dô dì nue ngivihi la mug mi la ên nêb ob la kisuu yaén, dì Samelia vêx ti val ên nêb ob kilê mia om Yesu nêl vô i ên nêbê, "Kilê mia mi lam ên a ob num."

⁹ Lêc vêx tyo nêl vô i ên nêbê, "Ông vux Yuda dì a vêx Samelia. Bêna lêc ông kitaa mia vô a?" Nêl bêge, ên Yuda yuu Samelia o mi keac vîma lêm.

¹⁰ Mêd Yesu nêl vô i ên nêbê, "Ông obêc xovô vizid wê Anutu vông ge dì ông obêc xovô xomxo ti wê nêl vô ông ên nêbê ông vông mia mi i

num ge od ông obêc kitaa mia vô i dì i vông mia mavîha vô ông.”

¹¹ Lêc vêx tyo nêl vô i ên nêbê, “Xomxo levac, ông nêm dêg ma, dì mia tô mi lax ngîbi ganê, om ông ob kîlê mia mavîha tige gê na?”

¹² Bug Jekop vông lôva tiga vô xe, dì i hixôn nue dì i bwoc, he xôn mi num vac, lêc mêt ông luu Jekop vêlê?”

¹³ Lêc Yesu nêl vô vêx Samelia tyo ên nêbê, “Xomxo vihati wê num mia tiga, he ob xo mia tii vac.

¹⁴ Lêc xomxo ti obêc num mia wê a vông ge od ob xo mia bê ob num i tii vac lêm. Ma vêl, Ên mia wê a ob vông vô i ge obêc pítuv vac i nîlô dì vông i dô mavîha luta lêc luta.”

¹⁵ Om vêx tyo nêl vô i ên nêbê, “Xomxo levac, ông vông mia tige vô a mi a num êdêc a xoên mia tiga i ma dì a lam kîlêen tii vacên i ma.”

¹⁶ Yesu nêl vô i ên nêbê, “Loc keac liyam di muu xôn lôm.”

¹⁷ Lêc vêx tige nêl ên nêbê, “A liyag ma.” Mêt Yesu nêl vô i ên nêbê, “Ông nêl vixôhilôg ên ông nêbê ông liyam ma.

¹⁸ Ên ilage ông kô vux vigê vîlu lêc sea he di vux wê dô hixôn ông gwêbaga ge, o ông liyam lêm. Om kiyang wê ông nêl ge, ông nêl nôn.”

¹⁹ Mêt vêx tyo nêl vô i ên nêbê, “Xomxo levac, ga a xovô ên a nêbê ông plopete ti.

²⁰ Xe buge lam mi kitaa vô Anutu lec kitôn tiga, lêcom xam Yuda nêl ên xam nêbê vigwe wê il ob kitaa vô Anutu ge, vigwe Jelusalem tibed.”

²¹ Mêt Yesu nêl vô i ên nêbê, “Vêx, ông vông i vin kiyang wê a ob nêl ga bê tîmuên ge xam

obêc kitaa vô Mag lec kitôn tiga lêm, dì xam ob kitaa gê Jelusalem êno lêm.

²² Xam Samelia mi kitaa lê, lêc xam lungên xomxo wê xam mi kitaa vô i ge. Dì xe Yuda, Anutu wê xe mi kitaa vô ge, xe xovô pyap, ên xomxo ti wê ob vô xomxo vêl ên nipaên ge lam vac xe Yuda.

²³ Buc ti obêc val, om gwêbaga buc tyo val pyap, om xomxo wê ob kitaa nôn ge, Myakilôhô Ngibua ob ngidu he xôn dì he ob kitaa vô Mag hixôn kiyang nôn. Ên xomxo tibêgee wê Anutu xêyaa vin lec nêb he i kitaa vô i.

²⁴ Anutu ge Myakilôhô, om xomxo obêc nêb kitaa vô i ge od Myakilôhô Ngibua i ngidu he xôn dì he i kitaa hixôn kiyang nôn.”

²⁵ Mêdvêx tyo nêl vô Yesu ên nêbê, “A xovô ên a nêbê Mesaia ti wê Anutu vîn oo ge wê he nêl lê nêbê Kîlisi ge obêc val. Dì obêc val ge od ob nêl kiyang vihati kehe kitong vô il.”

²⁶ Yesu nêl vô i ên nêbê, “A tyo ga mê, wê a dinêl kiyang vô ông ga.”

²⁷ Yesu nêl kiyang tige, dì nue ngivihi vena yê wê Yesu dîkeac hixônvêx tige dì he yetac ên. Lêc he ti o nêl vô i lêm bê “Ông ob kô vatya? Dì ông keac vô vêx tige ên va?”

²⁸ Mêdvêx tige sea dêg le dì lax mî la viyangtôv dì lax nêl vô xomxo tîbeac ên nêbê,

²⁹ “Xam lam loc wê xomxo ti wê nêl kiyang a vông ilage vihati kitong. Ganê mêt Kîlisi ti wê il dô bin ge yuubê?”

³⁰ Om he sea ben dì lam vô Yesu.

³¹ He gên dîlam dì Yesu nue ngivihi nêl vô Yesu ên nêbê, “Xolac kehe, wa yaên lê.”

³² Lêc Yesu nêl vô he ên nêbê, “Yaên wê a vông ge dô, lêcom xam lungên.”

³³ Om nue ngivihi kînêg vîma ên nêbê, “Mêd xomxo ti vông yaên vô i?”

³⁴ Lêc Yesu nêl vô he ên nêbê, “Yaên wê ob den a ge bêga bê a ob vông kiyang yuu yuac wê xomxo ti wê vông a lam ge nêb a vông ge i loc pyap lê.

³⁵ Xam nêl ên xam nêbê dentuc yuudiyyuu obêc lam la vêl dî xam ob la kô yaên nôn vac yuac. Lêc a ob nêl vô xam bê xam vêl mamnôn lec mi wê yuac, ên xomxo viac he pyap tiyi wê xam ob la nêl xolac vô he ge, tiyi xocbê susu vô nôn vac yuac ge.

³⁶ Xomxo wê ob la kô nôn vac yuac ge ob kô nôn niviha lec yuac wê he vông ge dî ob kituc nôn tige la dô niviha luta lêc luta. Om xomxo wê xin vê ge hixôn xomxo wê kô nôn ge, yuu xôn xêyaa vô niviha.

³⁷ Om kiyang wê nêl ên nêbê xomxo ngwe ob xin vê dî ngwe ob la kô nôn ge, kiyang nôn.

³⁸ A vông xam la ên a nêb xam kô nôn vac yuac wê xam o vông ilage lêm ge. Yuac wê xomxo mugên vông pyap ge, xam ob la kô nôn vac.”

³⁹ Tibii Samelia wê dô vac vigwe tige, he tibeac vông i vin Yesu ên wê vêx tige nêl ên nêbê, “Yesu nêl kiyang wê a vông ilage vihati kitong.”

⁴⁰ Mêd tibii Samelia la vô Yesu dî la kitaa i nêb i dô hixôn he, om Yesu dô hixôn he tiyi buc yuu,

⁴¹ dî xomxo tibeac hiwocêng ông kiyang wê Yesu nêl ge om he vông i vin.

⁴² Mêd he nêl vô vêx tyo ên nêbê, “Xe o vông i vin lec ông vyam wê ông nêl ge lêm. Nge, xecxe

va ngô i vya om xe xovô ên xe nêbê xomxo ti wê ob hôm xomxo kibun ga vihati lec ge, xomxo tyo tiga vixôhilôg nôn.”

Yesu vông xomxo levac ti nu vô niviha lec

⁴³ Yesu dô vac vigwe tige buc yuu dêc sea dì la Galili.

⁴⁴ Yesu vaci nêl ila ên nêbê plopete ti lie vac ici va ben ob kô i lec niviha lêm.

⁴⁵ Mêd Yesu mila Galili, dì tibii Galili hôm i lec niviha, ên he êno la yê buc ngibua gê Jelusalem om he yê môt vihati wê Yesu vông vô buc tige.

⁴⁶ Mêd Yesu lax mi la Kena wê yêp vac vigwe levac Galili ge. Kena ge vigwe wê Yesu pilepac mia tu wain vac ilage. King nu hizap ti dô vac vigwe Kapaneam, lêc nu vux ti, yidac vông.

⁴⁷ Mêd xomxo levac tyo ngô wê Yesu sea Judia dì lam dô Galili ge, om la vô Yesu dì la kitaa i ên nêb i loc Kapaneam ên loc vông i nu i vô niviha lec, ên nu vô kwabo lec wê ob yib ge.

⁴⁸ Lêc Yesu nêl vô xomxo levac tyo ên nêbê, “Xam wêen do levac obêc ma ge od xam nêb xam ob vông i vin lêm.”

⁴⁹ Mêd xomxo tyo nêl vô i ên nêbê, “Xomxo levac, lam lutibed ên a nug obêc yib.”

⁵⁰ Mégem Yesu nêl vô i ên nêbê, “Ông lôc, ên ông num obêc vô niviha lec.” Mêd xomxo tyo vông i vin kiyang wê Yesu nêl ge dì lax.

⁵¹ Mila môt mahigun ti dì nue yuac ya val nêl vô i ên nêbê, “Num vô niviha lec.”

⁵² Mêd xomxo tyo kinêg vô he ên nêbê, “Yidac sea i lec hiyôv manôn tina?” Om he nêl ên

nêbê, “Vihevage wê hiyôv kîlê ge num ninîvi vô ningigooên lec.”

⁵³ Mêd ma xovô nêbê hiyôv manôn tige wê Yesu nêl vô i nêbê nu vô nivîha lec ge. Mêgem xomxo tige he vinê nue vîhati vông i vin.

⁵⁴ Buc wê Yesu sea Judia dî lax mi la Galili ge od vông do tiga wê vông yuu ge vac vîgwe Galili.

5

Yesu vông xomxo ti vô nivîha lec vac mia luaên Betesda

¹ Buc ya lam la vêl mêt buc levac wê Yuda vông ge ti vô kwabo lec om Yesu la Jelusalem.

² Jelusalem ge, mia luaên ti yêp kwabo vô bwoc sipsip vuayen. Mia luaên tige, Hiblu vya nêbê Betesda, dî xumac nipwo vîgê vîlu le vô mia luaên tige ninya.

³ Xomxo yidac tîbeac yêp vac xumac tigee, ya manôn toc, dî ya vixa vô nipaên dî ya len vô xèlehe. [Xomxo tigee dô bin buc wê mia obêc vô mahilevac ge,

⁴ ên buc ya Apumtau vông angela ti lam la vac mia nilô dî vông mia vô mahilevac, dî xomxo yidac ti obêc la vac mia wê vô mahilevac ge tax ge, od ninîvi obêc vô nivîha lec.]

⁵ Vux ti yêp vac xumac tige, lêc yidac vông i tiyi klismas kehe ti dî vîgê yuu dî vixa vîlu dî sec yon (38).

⁶ Mêd Yesu yê xomxo tige wê diyêp ge dî xovô nêbê yidac vông i tiyi klismas tîbeac, om kinêg vô i ên nêbê, “Ông nêb ông nimnîvi i vô nivîha lec, me?”

⁷ Mêd xomxo tyo nêl vô i ên nêbê, “Xomxo levac, vô buc wê mia vô mahilevac ge od a lige wê ob vông a la vac mia ge ti o dô lêm, om a nêb a ob la vac mia lê, lêc xomxo le luu a vêl dì la vac mia tax.”

⁸ Om Yesu nêl vô xomxo tyo ên nêbê, “Kidi lec mì kô ông guhu lec dì loc.”

⁹ Mêd lutibed xomxo tyo ninivi vô nivîha lec dì i kô i guhu lec dì la.

Buc tige, buc wê sabat ge,

¹⁰ om he Yuda nêl vô xomxo ti wê Yesu vông i vô nivîha lec ge ên nêbê, “Gwêbaga buc sabat, dì kiyang yêp bêga nêbê ông ob kilê guhu lec sabat lêm.”

¹¹ Lêc xomxo tyo nêl vô he ên nêbê, “Xomxo ti wê vông a vô nigviha lec ge nêl vô a ên nêbê, ‘Hôm ông guhu lec dì loc.’ ”

¹² Om he kinêg vô i ên nêbê, “Xomxo letya wê nêl vô ông ên nêbê ông hôm guhu lec dì loc ge?”

¹³ Lêc xomxo tyo lungên, ên xomxo tibeac dô vac viabwe tige dì Yesu loc mì la vac he mahigun dì la.

¹⁴ Nang dì buc ngwe lêc Yesu mìla tulec xomxo tyo vac Anutu xumac ngibua om nêl vô ên nêbê, “Wê lê. Ông nimnivi vô nivîha lec. Om le i lêc vông nipaên ti i tii vac lêm, ên viyin levac mabu obêc val vô ông i luu ilage vêl.”

¹⁵ Mêd xomxo tige lax mì la vô he Yuda dì nêl ên nêbê, “Xomxo ti wê vông a vô nigviha lec ge Yesu.”

¹⁶ Mêgem he Yuda nêb ob vông viyin vô Yesu ên wê vông môp tige lec buc sabat ge.

17 Lêc Yesu nêl vô he ên nêbê, “Mag vông yuac lec buc vihati, dì a êno vông yuac bêge.”

18 Mêgem he Yuda yê Yesu xôn ên nêb ob hi i yib, ên wê vông sabat vô nipaên ge, lêc o sabat kiyang tibed lêm. Nge, Yesu nêl ên nêbê “Anutu ge a mag”, om Yuda yê i tiyi xocbê yong i nêb yuu xôn Anutu tiyima.

Yesu nêl kiyang lec yuac wê ob vông ge

19 Mêgem Yesu nêl vô he Yuda ên nêbê, “A nêl vixôhilôg nôn vô xam bê a Anutu nu, a o tiyi wê a ob vông môp i tiyi xovôên wê aca va vông ge lêm. Nge, môp wê a vông ge a vông vihati tiyi môp wê Mag vông mì a xê ge. Môp wê Mag vông ge, a êno ob vông i tiyi.

20 Ên Ma xêyaa vin lec nu tuc om hilung môp vihati wê i vông ge vô i, lêc do levac wê luu môp tigee vêl ge, Ma obêc hilung vô nu dì i vông om xam obêc yetac mabu ên do wê i vông ge.

21 Mag vông xomxo kidi lec vac yibêñ dì vông he dô mavîha, dì nu tuc obêc vông xomxo wê vinoo he ge i dô mavîha bêge êno.

22 Dì Mag ob yaxên xomxo ti nêñ kiyang lêm. Nge, vô vac nu tuc vigê ên nêb i yaxên xomxo vihati nêñ kiyang.

23 Ma vông bêge ên nêb xomxo vihati i pîmil nu tuc lê i tiyi xocbê he pîmil Ma lê ge. Xomxo ti obêc pîmil nu lêm ge od tiyi xocbê o pîmil Ma wê vông i lam ge lê lêm.

24 “A nêl hixôn nôn vô xam bê xomxo wê ngô a kiyang dì vông i vin xomxo ti wê vông a lam ge, xomxo tigee ob dô mavîha luta lêc luta, dì he ob tulec myaviwen nipaên ti lêm, ên Anutu xovô

pyap nêb ob vô he vêl ên yibên dì vông he dô maviha luta lêc luta.

²⁵ “A nêl hixôn nôn vô xam bê buc ti obêc val om val gwêba pyap, mêgem xomxo wê dô vac môp mayibên ge he ob ngô Anutu nu vya, dì he wê ngô ge ob dô maviha.

²⁶ Mag ge maviha kehe, om vông maviha wê i vông ge vô nu tuc.

²⁷ Ma vînoo nu tuc pyap ên nêb i yaxêñ xomxo vîhati nêñ kiyang, ên i Xomxo Nu.

²⁸ Xam o lêc yetac dì nga vigêm ên kiyang tiga lêm. Ên buc ti obêc val, dì tibii vîhati wê yêp vac lôva ge obêc ngô i vya

²⁹ dì kidi mi lam, om he wê vông môp niviha ge obêc kidi lec mi dô maviha, dì he wê vông nipaêñ ge obêc kidi lec dì kô myaviwen nipaêñ.”

Yesu nêl i kitong nêb i Anutu nu

³⁰ “A o tiyi wê a ob vông môp ti ya xovôêñ wê aca va vông ge lêm. Nge, a yaxêñ xomxo nêñ kiyang tiyi xocbê kiyang wê a ngô vô Mag ge. Dì a yaxêñ xomxo nêñ kiyang ya môp bôbac, ên a o timu vô piyôp wê a vông ge lêm. Nge, xomxo ti wê vông a lam ge, a timu vô kiyang wê i vông ge.

³¹ “Aca va obêc nêl a kehe kitong ge od obêc tiyi lêm.

³² Lêc xomxo ti wê nêl a kehe kitong ge dô, dì a xovô ên a nêbê kiyang wê xomxo tige nêl lec a ge kiyang nôn.

³³ “Xam Yuda, xam vông xomxo la vô Jon ilage, dì Jon nêl kiyang nôn kehe kitong.

³⁴ A o xo ên a nêb xomxo kibun ga i nêl a kehe kitong lêm. Lêc a nêb Anutu i vô xam vêl om a nêl kiyang tiga kitong vô xam.

³⁵ Jon ge tiyi xocbê ngwax wê linac xêseac vô xam ge, om xam xêmyaa vô nivîha dì xam dô vac xêseac wê i vông ge myabo tya.

³⁶ Dì gwêbaga a lam vông yuac om yuac tige nêl a kehe kitong luu kiyang wê Jon nêl ge vêl. Ên a lam vông yuac wê Mag nêb a vông ge, om yuac tige nêl a kehe kitong nêbê Mag vông a lam.

³⁷ Dì Mag wê vông a lam ge, nêl a kehe kitong hixôn. Xam o ngô i vya lêm dì xam o wê i nôn lêm,

³⁸ dì kiyang wê i vông ge o yêp vac xam nilôm lêm, ên Mag vông a lam, lêc xam o vông i vin a lêm.

³⁹ Kiyang wê yêp vac kipihac xolac ge, xam mi kitong ên xam xo ên xam nêbê mavîha kehe luta yêp vac kiyang tige. Dì xolac tige wê nêl a kehe kitong,

⁴⁰ lêc xam nêb xam ob lam vô a êdêc dô mamvîha lêm.

⁴¹ “A o lam ên a nêb xomxo i vông lê levac vô a lêm.

⁴² Lêc a xovô ên a nêbê xam xêmyaa o vin lec Anutu lêm.

⁴³ A tu Mag manôn mi lam vô xam, lêc xam o kô a lec nivîha lêm. Dì xomxo ti obêc lam vô xam lec ici va lê ge od xam kô i lec nivîha.

⁴⁴ Xam kô lêm levac vô lime vaci, dì lê levac wê Anutu tibed ob vông vô xomxo ge, xam nêb xam ob kô lêm. Om xam obêc vông i vin tibêna?

⁴⁵ Xam o lêc xo bê a ob vông kiyang vô xam vô

Anutu manôn lêm. Xomxo wê ob vông kiyang vô xam ge, Moses ti wê xam vông i vin ên xam nêbê obêc ngidu xam xôn ge.

⁴⁶ Xam obêc vông i vin kiyang wê Moses vông ge od xam obêc vông i vin kiyang wê a vông ge hixôn, ên Moses ge wê kivuu kiyang lec a.

⁴⁷ Lêc xam o vông i vin kiyang wê Moses kivuu ge lêm, om xam obêc vông i vin kiyang wê a nêl ge tibêna?"

6

Yesu vet xomxo 5,000

(*Matyu 14:13-21; Mak 6:30-44; Luk 9:10-17*)

¹ Yesu nêl kiyang tige vêl di tô mi sox la mia Galili vilu ganê. Mia tige lê ngwe nêbê Taibilias.

² Mêd xomxo tibeac hiwocên tiimu vô Yesu vixa mi la, ên he yê do levac wê Yesu vông xomxo yidac vô niviha lec ge.

³ Mêd Yesu he nue ngivihi lec kitôni ti mi la dô lec.

⁴ Mêd buc ngibua wê Yuda ob yê Pasova ên xovô buc wê he sea Isip ilage vô kwabo lec.

⁵ Lêc Yesu yê xomxo tibeac val om nêl vô Pilip ên nêbê, "Il ob kisuu blet gê na mi vet xomxo tigae ya?"

⁶ Yesu xovô môp wê nêb ob vông ge pyap, lêc nêl kiyang tige vô Pilip ên nêb ob yaxên i.

⁷ Mêd Pilip nêl vô i ên nêbê, "Il obêc kisuu blet lec mone yul yuu (K200) mi vông nipwo tyatya vô he ge od yaên tige obêc tiyi he vihati lêm."

⁸ Mêd nue ngivihi ngwe lê nêbê Andlu, wê Saimon Pita li ge
nêl ên nêbê,

9 “A xê xomxo nipwo ti wê kô blet vîgê vîlu di beac yuu, lêc yaên tige o tiyi xomxo tibeac tigae lêm.”

10 Mêd Yesu nêl ên nêbê, “Xam vông xomxo vihati i tô mi dô kibun lê.” Vîgwe tige hisinac niviha dô om he dô kibun lec. Xomxo tigee tibeac hiwocêñ om vux vaci tiyi xocbê 5,000.

11 He dô kibun pyap mêd Yesu hôm blet tige di kitaa lec mêd titang vô xomxo vihati. Nang dêc vông bêge vô beac hixôn, mêd xomxo vihati ya di i den he.

12 He ya pyap, mêd Yesu nêl vô nue ngîvihi ên nêbê, “Xam vîlu myapîpu wê he ya di i dô gee mi tung i dô kîdu ti, ên ti i o loc dô sea lêm.”

13 Mêgem he kituc myapîpu wê xomxo ya di i dô gee mi su vac sepac vîgê yuu di tô mi la yuu mi i pup lec.

14 Xomxo tigee yê do levac wê Yesu vông ge om nêl ên nêbê, “Plopet ti wê he nêb ob lam kibun ge, tyo tiga vixôhilôg nôn.”

15 Mêd Yesu xoyô wê he nêb he ob hôm i xôn di vông i tu he nîen king ge, om sea he di ici va lax mi la lec kitôn.

*Yesu la lec mia luaên kisii
(Matyu 14:22-33; Mak 6:45-52)*

16 Vigwe huc di Yesu nue ngîvihi lop mi la mia luaên ninya,

17 di lec la lec dipac ti di la, ên nêb ob lax mi la Kapaneam wê yêp mia luaên vîlu ganê. Di vigwe buc lêc Yesu o mila vô he decdec lêm.

18 Mêd lea levac ti val om vông mia vô mahilevac xocbê ob kipyax he vac,

19 om he hisoo mia mì la mahigun dia tyá tìyi xocbê 5 kilomita ge, léc he yê wê Yesu lam lec mia kisii mì val kwabo vô dipac ge om he xonamabu.

20 Léc Yesu nél vô he ên nêbê, “Ga a, om xam xona ên i ma.”

21 Mêd he nél vô Yesu ên nêb i lec lam lec dipac, di lutibed dipac mìla le kehe vô vigwe ti wê he nêb he ob la ge.

Xomxo tibeac myag Yesu

22 Vigwe vidiîen titige, xomxo tibeac gên dô vô mia luaên ninya vilu ganê dì dô bin Yesu, ên he xovô ên he nêbê dipac tibed sea vigwe tige vihevage dì la, di Yesu nue ngivihi heche va la lec dipac tige dì Yesu o la hixôn he lêm.

23 Mêd dipac mangwe lam gê vigwe Taibiliaas dì lam le vô vigwe ti wê Apumtau Yesu kitaa lec blet mì xomxo ya vihevage.

24 Mêd xomxo tigee yê léc Yesu he nue ngivihi o dô lêm om he la lec dipac ti dì la ên nêb ob la myag Yesu gê Kapaneam.

Yesu ge yaên wê ob vông xomxo dô mavîha

25 Xomxo tigee mìla yêvô Yesu gê mia luaên vilu ganê dì kinêg vô i ên nêbê, “Xolac kehe, ông lam ga yelacna?”

26 Léc Yesu nél vô he ên nêbê, “A nél hixôn nôn vô xam bê xam myag a, léc xam o xovô do levac wê a vông ge léc lam myag a lêm. Nge, xam xovô blet wê xam wa i den xam ge om xam lam myag a.

27 Le i léc vông yuac levac ên yaên wê ob vô nipaên ge lêm. Nge, xam vông yuac lec yaên wê xam ob kô dì dô mamvîha luta ya ge. Yaên tige,

a, Xomxo Nu, a obêc vông vô xam, ên Mag Anutu vinoo a pyap ên nêb a vông i yuac.”

28 Om he nêl vô i ên nêbê, “Xe ob vông Anutu yuac ga tibêna?”

29 Om Yesu luu he vyâ bêga nêbê, “Yuac wê Anutu vông ge bêga bê xam vông i vin xomxo ti wê Anutu vông i lam ge.”

30-31 Mêd he kinêg vô i ên nêbê, “Om ông ob vông do levac tina ên xe xê dì vông i vinê? Ên buge ilage ya yaên mana vac vigwe mahigun pileva, tiyi xocbê kiyang wê yêp vac xolac bêga nêbê, ‘Ici va vông yaên lag puunê vô he mi he ya.’ Om ông ob vông do levac tibêge, me?”

32 Lêc Yesu nêl vô he ên nêbê, “A nêl vixôhilôg nôn vô xam bê Moses o vông yaên lag puunê vô xam lêm. Nge, Mag vaci wê vông yaên nôn lag puunê vô xam ge.

33 Yaên wê Anutu vông ge, lam gê lag puunê di lam vông xomxo kibun ga dô maviha.”

34 Om he nêl vô i ên nêbê, “Xomxo levac, ông vông yaên tige vô xe i tiyi buc vihati ên va.”

35 Om Yesu nêl vô he ên nêbê, “Aca va ga, a yaên wê ob vông xomxo dô maviha ge. Xomxo ti obêc lam vô a ge od vip obêc den i tui vac nang lêm, dì xomxo ti obêc vông i vin a ge od obêc xo mia ti i tui vac lêm.

36 A nêl gwêba vô xam ên a nêbê xam wê a pyap lê, lêc xam o vông i vin lêm.

37 Xomxo wê Anutu vinoo nêb he i tu axe ge, vihati obêc lam vô a, dì xomxo ti obêc val vô a ge, od a obêc tii i lêm.

38 Èn a o lop mi lam gê lag puunê ên a nêb a ob vông i tiyi xovôên wê aca va vông ge lêm. Nge, a lam ên a nêb a ob timu vô kiyang wê xomxo ti wê vông a lam ge nêl ge.

39 Xomxo ti wê vông a lam ge nêb a o lêc sea xomxo wê i vinoo nêb he i tu axe ge ti i dô xel lêm. Nge, nêb a lêc tipi vô he vihati i kidi lec vô buc timuên.

40 Èn Mag nêl kiyang yêp bêga nêbê xomxo wê yê nu tuc di vông i vin ge, he vihati obêc dô mavîha luta lêc luta, di a obêc tipi vô he kidi lec vô buc timuên.”

41 Mêd he Yuda ngô kiyang wê Yesu nêl ên nêbê, “Aca va yaên wê a lop mi lam gê lag puunê,” om he kunac i di nêl kiyang ni nyagén lec i

42 di nêl ên nêbê, “Xomxo tige Yesu wê Josep nu ge, di ta yuu ma il xovô. Bêna lêc nêl ên nêbê i lam gê lag puunê?”

43 Lêc Yesu nêl vô he ên nêbê, “Le i lêc ngaênma lec a lêm.

44 Èn xomxo ti o tiyi wê ici va ob lam timu vô a ge lêm. Mag wê vông a lam ge obêc didii xomxo ti ge od obêc lam timu vô a, di a obêc tipi vô i kidi lec vô buc timuên.

45 Kiyang yêp vac kipihac wê plopete kivuu ilage bêga nêbê, ‘Anutu ob tixuu xomxo vihati.’ Om xomxo vihati wê ngô Mag kiyang di kô xovôên vô i ge ob lam vô a.

46 Èn xomxo ti o yê Mag lec manôn lêm. Nge, a wê a lam vô Anutu ge a tibed wê a xê i.

47 A nêl hixôn nôn vô xam bê xomxo wê vông i vin ge obêc dô mavîha luta lêc luta.

⁴⁸ A ga, yaên wê ob vông xomxo dô mavîha luta.

⁴⁹ Bume ilage wê ya yaên mana vac vîgwe mahigun pileva ilage, he ya lêc yib.

⁵⁰ Lêc yaên wê lam gê lag puunê ge, xomxo ti obêc ya ge od ob yib lêm.

⁵¹ A ga yaên mavîha wê a lop mi lam gê lag puunê. Om xomxo ti obêc ya yaên tiga ge od ob dô mavîha luta lêc luta. Yaên wê a ob vông vô i ge, aca va liyôhô wê a ob vông, ên xomxo kibun ga i dô mavîha.”

⁵² Mêgem Yuda ngaênma lec kiyang tige di nêl vîoma ên nêbê, “Xomxo tige obêc vông i liyôhô mi il xa tibêna?”

⁵³ Om Yesu nêl vô he ên nêbê, “A nêl hixôn nôn vô xam bêga bê xam obêc wa a, Xomxo Nu, liyôhô di num a hi lêm ge od xam ob dô mamvîha lêm.

⁵⁴ Xomxo wê ya a liyôhô di num a hi ge, he ob dô mavîha luta lêc luta, di a obêc tipi vô he kidi lec mavîha vô buc timuên.

⁵⁵ Ên a liyôhô tu yaên nôn, di a hi tu mia numên nôn.

⁵⁶ Xomxo wê ya a liyôhô di num a hi ge, he ob dô vac a nilôg di a ob dô vac he nilô.

⁵⁷ Mag mavîha vông a lam, di a dô magvîha ya xêkizêc wê Mag vông ge. Om xomxo ti obêc ya a ge, od ob dô mavîha ya xêkizêc wê a vông ge.

⁵⁸ Tiga, yaên wê lam gê lag puunê ge, lêc o tiyi xocbê yaên wê bume ya ila ila lêc yib ge lêm. Nge, yaên tiga wê xomxo obêc ya ge od ob dô mavîha luta lêc luta.”

⁵⁹ Yesu nêl kiyang tige vô xomxo vac Yuda xumac lilo gê Kapaneam.

Yesu ge kiyang maviha dôen kehe

⁶⁰ Xomxo wê mi la hixôn Yesu gee he tibeac ngô kiyang tige wê Yesu nêl ge, om he nêl ên nêbê, “Kiyang tiga viyin levac, om letya tiyi wê ob ngô ge?”

⁶¹ Yesu xovô wê he nêl kiyang tibeac tibeac lec tige om nêl vô he ên nêbê, “Kiyang tige juda xam, me?

⁶² Xam obêc wê Xomxo Nu lax mi la vac vigwe ti wê dô vac ilage ge od xam obêc xo bêna?

⁶³ Myakilôhô Ngibua tibed wê ob vông xomxo dô maviha, di xekizêc wê xomxo vông ge ti o tiyi lêm. Kiyang wê a nêl vô xam ga ge, a nêl lec Myakilôhô Ngibua wê ob vông xomxo dô maviha ge.

⁶⁴ Léc xam ya o vông i vin lêm.” Yesu nêl bêge, ên ilage Yesu xovô xomxo wê vông vinên obêc ma ge, di xovô xomxo tya wê ob vông i vac tibii vevac vigê ge pyap.

⁶⁵ Mêd Yesu nêl ên nêbê, “Kiyang yêp bêge, om a nêl gwêba vô xam ên a nêbê xomxo ti o tiyi wê ici va ob lam timu vô a ge lêm. Mag obêc vông xekizêc vô i ge od obêc lam vô a.”

⁶⁶ Yesu nêl kiyang tige pyap mêd xomxo wê mi dô hixôn i ge tibeac sea i di o dô hixôn i tii vac nang lêm.

⁶⁷ Om Yesu kinêg vô nue ngivihi vigê yuu di tô mi la yuu ên nêbê, “Di xacxam va ob sea a êno di la mê?”

⁶⁸ Léc Saimon Pita nêl vô i ên nêbê, “Apumtau, xe ob la vô letya? Ên kiyang wê ông vông ge wê ob vông xomxo dô maviha luta lêc luta.

69 Om xe vông i vin dì xovô ên xe nêbê ông ge xomxo ngibua wê Anutu vông ông lam ge.”

70 Mêd Yesu nêl vô he ên nêbê, “A viñoo xam vigê yuu dì tô mi la yuu, lêcom xam ti tu Seten xe.”

71 Yesu nêl kiyang tige lec Judas wê Saimon Iskaliot nu ge. Ên Judas ge he vigê yuu dì tô mi la yuu ge ti, wê ob nêl Yesu kitong vô tibii vevac ge.

7

Yesu lie o vông i vin i lêm

1 Pyap dêc Yesu la vîlee vac vigwe levac Galili. Ên he Yuda wê dô Judia ge nêb ob hi Yesu i yib om Yesu nêb ob la vîlee vac vigwe Judia lêm.

2 Mêd Yuda buc ngibua ti wê he nêb ob xovô buc wê xumac sel ge vô kwabo lec,

3 om Yesu lie so vya vô i ên nêbê, “Sea vigwe ga dì loc Judia, ên nume i yê yuac wê ông mi vông ge hixôn.

4 Ên xomxo ti obêc nêb xomxo i xovô i ge od ob vông yuac xôpacên lêm. Om yuac wê ông mi vông ge, ông loc vông vô he manôn ên he tibeac i yê dì xovô.”

5 He ge Yesu lie, lêc he o vông i vin i lêm om he nêl kiyang tibêge.

6 Mêd Yesu nêl vô he ên nêbê, “A buc gên o vô kwabo lec lêm, dom xam ge, xam tiyi wê xam ob la tiyi buc vihati ge.

7 Xomxo kibun ga xêyaa ob vô myavinê vô xam lêm. Lêc he xêyaa vô myavinê vô a ên wê a nêl he nêni nipaên kitong ge.

⁸ Om xacxam va loc wê buc ngibua tige, ên a ob loc hixôn xam lêm, ên buc wê a vông ge gên o vô kwabo lec lêm.”

⁹ Yesu nêl kiyang bêge vô he dì dô Galili.

Yesu la yê buc levac gê Jelusalem

¹⁰ Yesu lie la mug mi la yê buc levac, dì Yesu vaci timu vô he vixa. Léc o la seac vô xomxo manôn lêm. Nge, xôpac ên he mi la.

¹¹ Léc he Yuda myag Yesu vô buc tige om he kinég ên nêbê, “Xomxo tyo dô tina?”

¹² Xomxo wê dô gee he keac kiyang tibeac lec Yesu, om he ya nêl ên nêbê, “Ge xomxo nivîha ti,” dì he ya nêl ên nêbê, “O xomxo nivîha lêm, ên mi kityoo xomxo.”

¹³ Léc xomxo ti o nêl kiyang tige seac mi xomxo tibeac ngô lêm, ên he xona ên Yuda levac.

¹⁴ Mìla vô buc levac tigee mahigun dì Yesu la vac Anutu xumac ngibua dì la nêl xolac vô xomxo.

¹⁵ He Yuda levac wê dô gee ngô Yesu kiyang dì yetac mabu om nêl ên nêbê, “Xomxo tige xovô xolac tige tibêna? Ên xomxo ti o tixuu i lêm.”

¹⁶ Léc Yesu luu he via ên nêbê, “Kiyang wê a nêl ga, o a kiyang lêm. Nge, xomxo ti wê vông a lam ge, i kiyang.

¹⁷ Xomxo ti obêc xovô nêb ob timu vô kiyang wê Anutu vông ge od ob xovô kiyang wê a nêl ga kehe bê a nêl Anutu kiyang me a nêl aca va kiyang.

¹⁸ Ên xomxo ti obêc nêl ici va kiyang ge od xovô nêb ob vông ici va lê i vô levac. Léc xomxo ti obêc vông xomxo ti wê vông i lam ge lê i vô levac

ge od i xomxo kiyang nôn dì kiyang kityooên ti o yêp vac i nilô lêm.

¹⁹ “Moses vông xolac vô xam ilage, lêc xam ti o timu vô xolac vihati lêm. Bêna lêc xam nêb xam ob hi a xibê?”

²⁰ Mêd xomxo tigee nêl vô i ên nêbê, “Letya nêb ob hi ôngê? Mêd vimwo nipaên ti dô vac ông nilôm om ông nêl kiyang tibêge.”

²¹ Lêc Yesu nêl vô he ên nêbê, “Xam nga vigêm ên do levac tibed wê a vông lec sabat mi xam wê ge.

²² Om xam ngô lê. Moses nêl vô bume ilage ên nêb he i gôl nue vux ninivi. Vixôhilôg, môp tige kehe o yêp vô Moses lêm. Nge, yêp vô tivame vaci. Lêc xam mi gôl nume ninivi lec sabat.

²³ Xam nêb xam ob timu vô Moses xolac om xam mi gôl nume ninivi lec sabat. Bêna lêc xam kunac a ên wê a vông xomxo ti ninivi vô nivîha lec vô sabat ge?

²⁴ Le i lêc yaxêن xomxo nêb kiyang vaxvax lêm. Nge, xam hivip kiyang kehe lec dì titô i yêp bôbac.”

Xomxo kinêg nêb ob xovô Yesu kehe

²⁵ Xomxo Jelusalem ya kinêg ên nêbê, “Xomxo ti wê he Yuda levac nêb ob hi i yib ge, tyo tiganê, me?

²⁶ Wê lê. Xomxo tyo nêl kiyang seac vac xomxo mahigun lê, lêc xomxo levac o nêl kiyang ti vô i lêm. Mêd he xo ên he nêb ge Kîlisi tyo, me?

²⁷ Lêc xomxo tyo, il xovô i ben kehe, dì Kîlisi wê ob val ge, il ob xovô ben kehe wê ob val vac ge lêm.”

28 Om Yesu nêl xolac vac Anutu xumac ngibua dì keac levac hixôn ên nêbê, “Xam nêb xam xovô a, dì xam xovô a bog kehe hixôn, me? Ên a o lam ya xovôên wê a vông ge lêm. Xomxo ti wê vông a lam ge, i xomxo kiyang nôn. Xam ge xam lungên i,

29 dì a ga, a xovô i pyap, ên a dô hixôn i dì i vông a lam.”

30 Mégem xomxo tigee nêb ob hôm Yesu xôn, lêc Yesu buc gên o vô kwabo lec lêm, om xomxo ti o tiyi wê ob hôm vigê lec i ge lêm.

31 Lêcom xomxo tibeac vông i vin nêbê Yesu ge Kîlisi om he nêl ên nêbê, “Il nêd Kîlisi obêc val ge od ob vông do levac luu do levac wê Yesu vông ge vêl lêm. Om Yesu ge Kîlisi tyo mê.”

He vông xêhipu la vô Yesu ên nêb he i loc hôm i xôn

32 He Palisi ngô wê xomxo nêl kiyang tibêge lec Yesu ge, om xomxo levac wê mi si daa gee hixôn he Palisi, he vông xêhipu ya la vô Yesu ên nêb he i loc hôm Yesu xôn.

33 Lêc Yesu nêl vô he ên nêbê, “A ob dô hixôn xam myabo tya, dì a obêc lax mi la vô xomxo ti wê vông a lam ge.

34 Xam obêc myag a, lêc xam wêvôên a obêc ma, di vigwe wê a ob la dô vac ge, xam ti ob la vac lêm.”

35 Mêd he Yuda levac nêl vôma ên nêbê, “Xomxo tyo nêb ob la na, lêc il xêên obêc ma? Mêd ob la vô Yuda wê la dô Glik ben ge ên nêl xolac vô he Glik, me?”

36 Xomxo tyo nêl ên nêbê il ob myag i, lêc il xêvôên obêc ma, dì vigwe wê ob la dô vac ge, il ob la vac lêm. Om kiyang tige kehe tibêna?”

Kiyang lec mia maviha

37 Buc levac tigee mila vô myahipu wê ob tiyôô vac ge dì buc tige buc levac wê luu baba vêl ge, om Yesu kidi lec vac he mahigun dì keac vya levac ên nêbê, “Xomxo ti obêc nêb num mia ge, od i lam vô a lê, ên a obêc vông mia mi i num.

38 Tiyi xocbê kiyang wê yêp vac xolac bêga nêbê, ‘Xomxo ti obêc vông i vin a ge od mia maviha obêc lam vac i nilô dì lop mi la.’ ”

39 Yesu nêl kiyang tige lec Myakîlôhô Ngîbua wê ob val vô he wê vông i vin Yesu ge. Lêc buc wê Yesu nêl kiyang tige, Myakîlôhô Ngîbua valên gên ma, ên Yesu gên o lax mi la dô vac xêseac lag puunê lêm.

Xomxo hibu he la yuu lec Yesu

40 Xomxo ngô kiyang tige di ya nêl ên nêbê, “Xomxo tiga, plopet ti wê il dô bin ge vixôhilôg.”

41 Dì he ya nêl ên nêbê, “Ge Kîlisi.” Lêc he ya nêl ên nêbê, “Kîlisi ob lam gê Galili lêm.

42 Ên kiyang yêp vac xolac bêga nêbê Kîlisi kehe yêp vac Devit om obêc lam gê Betlehem vac Devit ben.”

43 Mêgem xomxo tigee hîbu he la yuu lec Yesu,

44 dì he ya nêb ob hôm i xôn, lêc xomxo ti o hôm vigê lec i lêm.

Xomxo levac wê Yuda vông ge o vông i vin Yesu lêm

45 Mêd xêhipue lax mì la vô xomxo levac wê mi si daa gee hixôn he Palisi, dì he kînêg vô xêhipue ên nêbê, “Bêna lêc xam o kô i mì lamê?”

46 Lêc xêhipue nêl vô he ên nêbê, “Kiyang wê xomxo tyo mi nêl ge, xomxo ti o nêl kiyang tibêge ila lêm.”

47 Om he Palisi nêl vô he ên nêbê, “Xomxo ge kityoo xam êno.

48 Xomxo levac gae hixôn xe Palisi, xe ti o vông i vin xomxo tyo lêm. Ma vêl.

49 Dì xomxo tibeac wê ngô Yesu vyá ge, he o vyac xovô Moses xolac lêm, om he vô nipaên pyap.”

50 Lêc Palisi ti lê nêbê Nikodimas wê la vô Yesu ilage dô hixôn he, om nêl vô lie Palisi ên nêbê,

51 “O tiyi wê il ob vông kiyang vô xomxo ti vaxvax ge lêm. Ên xolac wê il vông ge nêl ên nêbê il ob ngô xomxo nêñ kiyang mì xovô môp wê i vông ge pyap tax lê.”

52 Lêc he so vyá vô i ên nêbê, “Ông ge tibii Galili ti om ông ngidu i xônê? Ông obêc kitong xolac wê yêp vac kipihac ge od ông ob xovô bê plopet ti ob lam gê Galili lêm.”

53 [Pyap dêc he vihati sea dì toto ge la ben.

8

He kô vêx yôdac ti mì la vô Yesu

1 Mêd Yesu lec mì la lec kitôn Oliv,

2 dì viigwe vidiien titige lax mì la vac Anutu xumac ngibua. Mêd xomxo tibeac kituc la vô i om Yesu dô dì vông xolac vô he.

³ Mêd xomxo wê xovô Moses xolac gee hixôn he Palisi, he yê vêx ti wê vông yôdac ge om kô vêx tyo mi la lax vac he mahigun.

⁴ Mêd he nêl vô Yesu ên nêbê, "Xolac kehe, vêx tiga vông môp yôdac mi xe xê.

⁵ Moses nêl vac xolac ên nêbê vêx tibêga, xomxo ob hi ya ngidax ên i yib. Om ông ob nêl bêna lec i?"

⁶ He nêl bêge, nêb ob yaxên Yesu bêc obêc nêl kiyang ti so ge od he ob vông kiyang vô i. Lêc Yesu yu kwa vac di so kibun ya vigê liyihi.

⁷ Mêd he kinêg tii vac vac vô Yesu, om Yesu kidi mi le kisii di nêl vô he ên nêbê, "Xomxo ti vac xam mahigun wê xovô nêb nipaên ti o yêp vô i lêm ge od i hôm ngidax mi nêx vêx tiga ya taxlee."

⁸ Mêd Yesu yu kwa vac di so kibun tii vac.

⁹ Xomxo tigee ngô kiyang wê Yesu nêl ge di xovô nêb nipaên om ti ti le lop mi la vixun. He levac la mug di he ba lop mi timu vô he vixa, di Yesu vaci hixôn vêx tyo wê yuu xeedô.

¹⁰ Mêd Yesu kidi mi le kisii di nêl vô vêx tyo ên nêbê, "Vêx, xomxo tigae la na? Ti dô wê ob vông kiyang vô ông ge, me?"

¹¹ Lêc vêx tyo nêl vô i ên nêbê, "Xomxo levac, ti dôen ma." Om Yesu nêl vô i ên nêbê, "Om a êno, a ob vông kiyang vô ông lêm. Ông loc, di le i lêc vông nipaên ti i tii vac lêm."]

Yesu ge xêseac wê ob linac vô xomxo gê kibun

¹² Yesu nêl vô xomxo tigee tii vac ên nêbê, "A xêseac wê linac lec kibun. Xomxo ti obêc timu vô a ge, od ob la vac mapitoc lêm. Nge, ob dô

vac xêseac wê ob vông i vô paha lec dì vông i dô mavîha ge.”

¹³ Om Palisi nêl vô i ên nêbê, “Ôcông va nêl ông kehe kitong om kiyang wê ông nêl ge o tiyi lêm.”

¹⁴ Mêlêc Yesu nêl vô he ên nêbê, “Vixôhilôg, aca va nêl a kehe kitong, lêc kiyang wê a nêl ga, ge kiyang nôn, ên a xovô vigwe kehe wê a lam vac ge, dì a xovô vigwe wê a ob lax mi la vac ge. Dì xam ge, xam o xovô a bog kehe wê a lam vac ge lêm, dì xam o xovô vigwe ti wê a ob lax vac ge lêm.

¹⁵ Xam yaxên xomxo nêl kiyang ya xovôên wê xacxam vông ge, dì a ga, a o yaxên xomxo ti nêl kiyang lêm.

¹⁶ Lêc a obêc nêb yaxên xomxo ti nêl kiyang ge od a ob yaxên i nêl kiyang ya môp bôbac, ên o aca va wê a ob yaxên xomxo nêl kiyang ge lêm. Nge, Mag wê vông a lam ge dô hixôn a.

¹⁷ Kiyang ti yêp vac xolac wê xam vông ge bêga nêbê xomxo yuu obêc nêl kiyang tiyima lec kiyang tibed ge od kiyang wê yuu nêl ge kiyang nôn.

¹⁸ A nêl a kehe kitong dì Mag wê vông a lam ge nêl a kehe kitong hixôn.”

¹⁹ Mêd he kinêg vô Yesu ên nêbê, “Mam dô gê na?” Lêc Yesu nêl vô he ên nêbê, “Xam lungên a dì xam lungên Mag êno. Xam obêc xovô a ge od xam obêc xovô Mag hixôn.”

²⁰ Yesu nêl xolac vô xomxo vac Anutu xumac ngîbua, vac niilô ti wê he tung mone daa vac ge, om nêl kiyang tige hixôn vô he. Lêc xomxo ti o hôm i xôn lêm, ên buc wê i vông ge o vô kwabo

lec lêm.

Yesu nêb ob lax kisii

²¹ Nang dêc Yesu nêl tii vac vô he ên nêbê, “A ob sea xam dì la, dì xam obêc myag a, lêc xam obêc wib hixôn nêm nipaên, ên vigwe wê a ob la vac ge xam obêc la vac lêm.”

²² Mêgem he Yuda nêl vîma ên nêbê, “Xomxo tige nêl ên nêb il ob la vac vigwe wê ob la dô vac ge lêm. Mêd ici va obêc hi i yib, me?”

²³ Mêd Yesu nêl vô he ên nêbê, “Xam ge kîbun, dì a ga kisii ganê. Xam xomxo kîbun, dì a ga, a o xomxo kîbun lêm.

²⁴ Kiyang bêge om a nêl vô xam gwêba ên a nêbê xam obêc wib hixôn nêm nipaên. Ên xam obêc vông i vin bê a Anutu nu lêm ge, od xam obêc wib hixôn nêm nipaên.”

²⁵ Om he kinêg vô Yesu ên nêbê, “Ông letya?” Lêc Yesu nêl vô he ên nêbê, “Bêna lêc a ob nêl kiyang tii vac vac vô xamê? A ga, xomxo ti wê a nêl vô xam ilage.

²⁶ A kiyang wê a ob nêl vô xam dì yaxên xam ge tibeac yêp. Lêc xomxo ti wê vông a lam ge, i kiyang nôn om kiyang wê a ngô vô i ge, a nêl kitong vô xomxo kibun ga.”

²⁷ Kiyang wê Yesu nêl vô he ge, he o xovô bê Yesu nêl lec Ma Anutu lêm,

²⁸ om Yesu nêl vô he ên nêbê, “Buc wê xam obêc hi Xomxo Nu lec xax ge od xam obêc xovô bê a Anutu nu mêt, dì xam obêc xovô bê yuac wê a vông ge a o vông ya xovôen wê aca vông ge lêm. Nge, a nêl kiyang tiyi kiyang wê Mag vông vô a ge.

²⁹ Mag wê vông a lam ge dô hixôn a dì o sea a dô tamaên lêm, ên a vông yuac wê Mag ob yê nivîha ge tiyi buc vîhati.”

³⁰ Yesu nêl kiyang tige om xomxo tîbeac vông i vin i.

Kiyang nôn obêc piwelac il vêl ên nipaên

³¹ Yesu nêl vô xomxo Yuda wê vông i vin i ge ên nêbê, “Xam obêc hôm a kiyang xôn pilihi mi dô vac ge od xam tu a nuge vông vinên nôn.

³² Xam obêc xovô kiyang nôn, dì kiyang nôn obêc piwelac xam vêl dì xam dô nimvîha.”

³³ Lêc he nêl vô Yesu ên nêbê, “Xe ga Eblaham bue, om xe o la vac xomxo ti kwa ngîbi ila mi tu he nue yuac lêm. Lêc bêna lêc ông nêl ên ông nêbê kiyang tige obêc piwelac xe vêl ên tibii levac wê viac xe ge?”

³⁴ Om Yesu nêl vô he ên nêbê, “A nêl hixôn nôn vô xam bê xomxo vîhati wê dô vac nipaên ge, he tu nipaên tige nue yuac pyap.

³⁵ Dì nue yuac ti o tiyi wê ob dô vac xumac luta ge lêm. Nge, xomxo levac nu vaci wê ob dô vac luta.

³⁶ Om Anutu nu obêc piwelac xam vêl ge, od xam obêc dô nimvîha nôn dì nipaên ti ob pitii lec xam lêm.

³⁷ A xovô ên a nêbê xam ge Eblaham bue, lêcom xam nêbê xam ob hi a xib, ên kiyang wê a vông ge o yêp vac xam nilôm lêm.

³⁸ Kiyang wê a nêl ge a nêl i tiyi wê a xê vô Mag ge, dì xam ge, xam vông i tiyi wê xam ngô vô mam ge.”

³⁹ Mêd he nêl vô Yesu ên nêbê, “Xe mag Eblaham.” Lêc Yesu nêl vô he ên nêbê, “Xam

obêc Eblaham nue nôn ge od xam obêc vông môp i tiyi wê Eblaham vông ge. Lêc xam o vông môp tiyi wê Eblaham vông ge lêm.

40 A nêl kiyang nôn wê a ngô vô Anutu ge vô xam, lêc xam nêb xam ob hi a xib. Môp wê Eblaham vông ge ti o yêp bêge lêm.

41 Xam vông môp tiyi xocbê mam mi vông ge.” Mêd he nêl vô Yesu ên nêbê, “Xe o tiyi xocbê nipwo wê ta kô vax dì ma ma ge lêm. Xe mag Anutu tibed wê dô ge.”

42 Lêc Yesu nêl vô he ên nêbê, “Anutu obêc xam mam vixôhilôg nôn ge od xam xêmyaa obêc vin lec a, ên a dô hixôn Anutu lêc lam. Dì a o lam i tiyi xovôên wê a vông ge lêm. Nge, Anutu vông a lam.

43 Xam o xovô kiyang wê a nêl ga lêm, kehe bêga nêbê xam nêb xam ob ngô a vyag lêm.

44 “Xam mam ge Seten, om kiyang wê yêp vac mam nilô ge, xam nêb xam ob timu vô mi vông i vô nôn lec. Buc taxlee ilage Seten mi hi xomxo yib dì o dô vac kiyang nôn lêm, ên kiyang nôn ti o yêp vac i nilô lêm. Dì kiyang wê mi nêl ge, nêl i tiyi kiyang kityooên wê yêp vô i ge, ên i xomxo kityooên wê tu kiyang kityooên kehe.

45 Dì a ga, a lam nêl kiyang nôn om xam nêb xam ob vông i vin kiyang wê a nêl ge lêm.

46 Xam letya tiyi wê xam ob nêl a nêg nipaên seac ge? A nêl kiyang nôn lê, lêc bêna lêc xam o vông i vin a lêmê?

47 Anutu nue ob ngô kiyang wê Anutu nêl ge. Lêc xam o Anutu nue lêm, om xam o ngô i vya lêm.”

Yesu luu Eblaham vêl

48 He Yuda luu Yesu via ên nêbê, “Xe nêl vixôhilôg nôn ên xe nêbê ông tibii Samelia wê vimwo nipaên dô vac ông nilôm ge.”

49 Lêc Yesu nêl ên nêbê, “Vimwo nipaên ti o dô vac a nilôg lêm. A vông Mag lê vô levac, lêc xam vông a lêg tô sea.

50 A o nêb a ob vông a lêg i vô levac lêm, lêc xomxo ti dô wê ob vông a lêg i vô levac, dì xomxo tige wê ob yaxêن xomxo nêl kiyang.

51 A nêl hixôn nôn vô xam bê xomxo ti obêc timu vô kiyang wê a vông ge od xomxo tige yibêñ obêc ma vêl.”

52 Mêgem Yuda tigee nêl vô Yesu ên nêbê, “Om gwêbaga xe xovô ên xe nêbê vimwo nipaên ti dô vac ông nilôm. Ên Eblaham hixôn plopete ilage, he yib mi la vêl, lêc ông nêl ên ông nêbê xomxo ti obêc timu vô kiyang wê ông vông ge od obêc yib gê kibun ga lêm.

53 Mêd ông nginoo il bug Eblaham vêl, me? Ên Eblaham yib dì plopete êno yib. Dì ông nêb ông ob vông ông tiyi letya?”

54 Mêd Yesu nêl vô he ên nêbê, “Aca va obêc pimil a lêg ge od obêc tiyi xocbê kiyang pîleva, lêc xomxo ti wê pimil a lêg ge, Mag vaci, wê xam mi nêl ên xam nêbê xam Anutu.

55 Lêc xam o xovô i lêm. Dì a ga, a xovô i. A obêc nêl bê a lungêñ Mag ge od a obêc xomxo kityooêñ tiyi xocbê xam ge. Lêc a xovô i pyap om a timu vô kiyang vihati wê i vông ge.

56 “Ilage bum Eblaham xêyaa vô nivîha ên nêb ob yê buc wê a vông ge, om yê buc tige dì xêyaa vô nivîha.”

⁵⁷ Lêc he Yuda nêl vô Yesu ên nêbê, “Klismas wê ông vông ge gên o mila vô kehe yuu di vigê yuu (50) lêm, lêc bêna lêc ông nêb ông wê Eblahamê?”

⁵⁸ Mêd Yesu nêl vô he ên nêbê, “A nêl hixôn nôn vô xam bê buc wê Eblaham gên ma ge od a dô tax.”

⁵⁹ He ngô Yesu kiyang tige om he hôm ngidax ên nêb ob nêx Yesu, lêc Yesu xôpac ên he dì sea Anutu xumac ngibua dì la vixun.

9

Yesu vông xomxo ma tocên ti vô niviha lec

¹ Yesu mila, lêc yê xomxo ti wê yubac hixôn ma tocên ge.

² Mêd Yesu nue ngîvihi kinêg vô Yesu ên nêbê, “Xolac kehe, letya vông nipaên lêc xomxo tige yubac hixôn ma tocên? Xomxo tige vaci vông nipaên, me ta yuu ma?”

³ Lêc Yesu nêl vô he ên nêbê, “Ge o ici va nêñ nipaên, me ta yuu ma nêñ nipaên wê vông i manôn toc ge lêm. Xomxo tige dô hixôn ma tocên ên Anutu nêb ob hilung xêkizêc wê i vông ge i yêp seac lec xomxo tige.

⁴ Xomxo ti wê vông a lam ge, il ob vông yuac wê i vông ge vô viđiiên xêseac, ên mapitoc obêc val dì a xib ge od xomxo ti o tiyi wê ob vông ge i yêp seac lec xomxo tige.

⁵ Buc wê a dô kibun ga ge, od xêseac wê a vông ge linac vô xomxo gê kibun.”

⁶ Yesu nêl bêge dì pisuv myaluc lec kibun dì pilepac i vô niluc dì lipac vô

xomxo matocên tyo manôn,

⁷ dì nêl vô i ên nêbê, “Loc lipac mamnôn vac mia luaên Siloam.” Lê Siloam ge kehe bêga nêbê vông i la. Om xomxo tyo la lipac manôn dì manôn seac dì i lax mì la ben.

⁸ Mêd xomxo tige lie viyangtôv hixôn xomxo wê yê wê mi kitaa mone vô xomxo ge, he nêl vòma ên nêbê, “Xomxo ti wê mi dô dì kitaa mone vô xomxo ge, ge mêd xomxo tyo tige mê, me?”

⁹ Mêd he ya nêl ên nêbê, “Ge xomxo tyo tige mê.” Lêc he ya nêl ên nêbê, “Ge o xomxo tyo lêm. Ge xomxo wê yuu manôn tiyima ge ngwe.” Om xomxo tyo nêl vô he ên nêbê, “A ga mê.”

¹⁰ Om he kinêg vô i ên nêbê, “Vatya vông ông mamnôn vô nivîha lecê?”

¹¹ Mêd xomxo tyo nêl vô he ên nêbê, “Xomxo ti lê nêbê Yesu ge pilepac myaluc hixôn kibun dì lipac lec a magnôn dì nêl vô a ên nêb a la lipac magnôn vac mia luaên Siloam. Om a la lipac dì a magnôn vô nivîha lec dì a xê vigwe.”

¹² Om he kinêg vô i ên nêbê, “Xomxo tyo dô gê na?” Lêc xomxo tyo nêl ên nêbê, “A lungên.”

¹³ Mégem he kô xomxo ma tocên tyo mì la vô he Palisi.

¹⁴ Buc wê Yesu pilepac kibun vô nubuluc dì vông xomxo tyo manôn vô nivîha lec ge, buc sabat,

¹⁵ om he Palisi kinêg vô xomxo tyo tii vac ên nêbê, “Vatya vông ông mamnôn vô nivîha lec?” Om xomxo tyo nêl vô he ên nêbê, “Xomxo tige lipac kibun nubuluc lec a magnôn dì a la lipac, lêc a magnôn seac.”

¹⁶ Mêd Palisi ya nêl ên nêbê, “Xomxo tige Anutu o vông i lam lêm, ên o timu vô môp wê

sabat ge lêm.” Lêc he ya nêl ên nêbê, “Xomxo tige obêc xomxo nipaên ge od o tiyi wê ob vông do levac tibêge lêm.” Om he hibuma dì le kidu yuu.

¹⁷ Mêgem Palisi la kinêg vô xomxo tyo tii vac nang ên nêbê, “Xomxo ti wê vông mamnôn vô niviha lec ge, ông nêbê vatya lec i?” Mêd xomxo tyo nêl ên nêbê, “Ge plopete ti.”

¹⁸ He Yuda o vông i vin bê xomxo tige manôn toc ila lêc vô niviha lec lêm, om he keac xomxo tyo ta yuu ma lam

¹⁹ dì kinêg vô yuu ên nêbê, “Muu num tiga wê muu nêb yubac hixôn ma tocên mê? Vatya vông manôn seac mi i yê vigwe?”

²⁰ Om ta yuu ma nêl ên nêbê, “Xii xovô ên xii nêbê ga xii nug wê yubac hixôn ma tocên ge.

²¹ Lêc môp wê manôn seac dì i yê vigwe ge, xii lungên, dì xii o xovô xomxo ti wê vông i manôn seac ge lêm. Xam loc kinêg vô ici va, ên vô levac pyap tiyi wê ob nêl kiyang kitong vô xam ge.”

²² Ta yuu ma nêl kiyang bêge, ên yuu xona ên he Yuda levac. Ên he Yuda hilu kiyang pyap ên nêbê xomxo ti obêc nêl Yesu kitong bê i Kîlisi ge od he ob tii i vêl ên xumac lilo dì i loc dô ninya.

²³ He Yuda nêl bêge om xomxo tige ta yuu ma nêl ên nêbê, “Vô levac pyap om xam kinêg vô ici va.”

²⁴ Om he Palisi keac xomxo ti wê manôn toc ilage lôm tii vac nang dì nêl vô i ên nêbê, “Ông pîmil Anutu môci lê. Ên xe xovô ên xe nêbê xomxo tige nipaên.”

²⁵ Lêc xomxo tyo nêl vô he ên nêbê, “A lungên, xomxo tige niviha me nipaên. Dì a xovô tibed

bêga bê ilage a magnôn toc lêc gwêbaga a magnôn seac.”

²⁶ Mêd he kînêg vô i ên nêbê, “Xomxo tige vô va vô ông lêc ông mamnôn seacê?”

²⁷ Lêc xomxo tyo ni nyag vô he om nêl ên nêbê, “A nêl vô xam lê, lêc xam o ngô lêm. Bêna lêc xam nêb a nêl i tii vacê? Mêd xam êno, xam nêb xam ob tu i nue hixônê?”

²⁸ Mêd he nêl kiyang nipaên lec i ên nêbê, “Ông ge, ông tu xomxo tige nu ti, dì xe ga, xe tu Moses nue.

²⁹ Xe xovô ên xe nêbê Anutu nêl kiyang vô Moses, lêc xomxo tige, xe o xovô bê lam gê na?”

³⁰ Mêd xomxo tyo nêl vô he ên nêbê, “Kiyang tige obêc kehe tibêna? Ên xam nêl ên xam nêbê xam o xovô xomxo tige ben kehe lêm, lêc xomxo tige vông a magnôn seac.

³¹ Il xovô ên il nêbê xomxo wê vông môp nipaên ge, Anutu ob ngô he vya lêm. Lêc xomxo ti obêc kitaa vô Anutu dì timu vô kiyang wê i vông ge od Anutu ob ngô i vya.

³² Buc taxlee ilage dì i val tyip lec gwêbaga, il o ngô kiyang lec xomxo ti wê yubac hixôn ma tocên lêc xomxo ngwe vông i manôn seac ge lêm.

³³ Anutu obêc vông xomxo tige lam lêm ge od o tiyi wê ob vông môp tibêge lêm.”

³⁴ Mêd he Palisi nêl vô xomxo tyo ên nêbê, “Tam kô ông hixôn nipaên, lêc ông nêb ông ob nêl kiyang vô xe?” Mêd he tii i la ninya.

35 Yesu ngô wê he tii xomxo tige la ninya ge om tulec i dì kinêg vô i ên nêbê, “Ông vông i vin Xomxo Nu, me?”

36 Lêc xomxo tyo nêl ên nêbê, “Xomxo levac, Xomxo Nu ge letya? Ông nêl kitong vô a ên a vông i vin i.”

37 Om Yesu nêl vô i ên nêbê, “Ông wê i pyap, ên xomxo tyo, a ga wê a keac vô ông mê.”

38 Mêgem xomxo tyo nêl ên nêbê, “Apumtau, a vông i vin.” Mêd yev vixa kitu vô Yesu dì pîmil i.

39 Mêd Yesu nêl ên nêbê, “A lam kibun ên a nêb a ob yaxêن xomxo nilô, ên xomxo wê manôn toc dì he lungên a ge he manôn i seac dì he wê manôn seac ge he manôn i toc.”

40 Palisi ya dô kwabo hixôn Yesu dì ngô kiyang wê i nêl ge om nêl vô i ên nêbê, “Ông nêb xe êno mamnôn toc mê?”

41 Mêd Yesu nêl vô he ên nêbê, “Xam mamnôn obêc toc ge od nipaên ti ob yêp vô xam lêm. Lêc xam nêl ên xam nêbê xam mamnôn seac dì xam xovô kiyang vihati, om nipaên levac gên yêp vô xam.”

10

Kiyang pilepacên lec xenac wê bwoc sipsip le vac ge

1 Yesu nêl ên nêbê, “A nêl hixôn nôn vô xam bê xomxo ti obêc nêb la vac xenac wê bwoc sipsip vông ge nilô, lêc o la bôbac vô vuayen tyo lêm, dì lec xenac vac bangwe ge od xomxo tige tiyi xocbê xomxo yôdac me tibii vevac.

² Lêc xomxo ti wê obêc la bôbac vac vuayen wê sipsip vông ge, ge xomxo ti wê mi viac sipsip ge,

³ mêtgem xomxo ti wê mi viac vuayen ge ob tax vuayen ên xomxo tige, dì sipsip ob ngô xomxo tige vya wê keac mi nêl he toto lê ge om xomxo tyo ob dìdii he mi la xenac kehe.

⁴ Dì bwoc sipsip wê i vông ge ob la xenac kehe pyap ge od xomxo tige ob la mug dì sipsip timu vô i vixa mi he la, ên sipsip xovô i vya pyap.

⁵ Dì sipsip o tiyi wê ob timu vô xomxo bangwe vixa ge lêm. Nge, ob pec ên i, ên he o xovô i vya lêm.”

⁶ Yesu nêl kiyang pilepacên tige vô he, lêc he o xovô kehe lêm.

Yesu ge wê viac bwoc sipsip niviha ge

⁷ Mêtgem Yesu nêl tii vac vô he ên nêbê, “A nêl hixôn nôn vô xam bêga bê a ga, a tiyi xochê vuayen wê bwoc sipsip vông ge.

⁸ Xomxo vihati wê lam tax tax ge he tiyi xochê xomxo yôdac hixôn tibii vevac, lêc sipsip o ngô he vya lêm.

⁹ A tiyi xochê vuayen. Xomxo ti obêc lam vô a mi la vac xenac nilô ge od ob la dô niviha, dì obêc lop mi la vixun dì lôm la xenac lôma ge od ob tulec yaên.

¹⁰ Tibii yôdac lam ên nêb ob vun bwoc sipsip dì hi he yib dì vông he vô nipaên. Dì a ga, a lam ên a nêb sipsip i dô mavîha dì kô vizid i luu vêl.

¹¹ “A ga, a xomxo wê a ob viac bwoc sipsip niviha ge. Xomxo wê viac sipsip niviha ge ob sea i ninivi dì yib ên ngidu he xôn.

12 Xomxo ti obêc viac sipsip nêb ob kô mone lec, lêc i o xomxo viacên nôn lêm, dì sipsip o tu ixe lêm, om xomxo tige obêc yê wê noo nipaên val ge od obêc sea sipsip dô dì pec mi la, dì noo nipaên obêc lam nga sipsip dì tii he la sea.

13 Kehe bêga nêbê xomxo tige viac sipsip ên nêb ob kô mone lec dì o xo vigwe pisiv ên sipsip lêm.

14 “A ga, a xomxo wê a ob viac bwoc sipsip niviha ge. A xovô sipsip wê a vông ge dì he xovô a,

15 tiyi xochê Mag xovô a dì a xovô Mag ge, om a ob xib ên ngidu sipsip xôn.

16 A bwoc sipsip ya dô lê, lêc he gên o lam dô vac xenac tiga lêm. Om a ob la kô he mi lam tung hixôn, dì he ob ngô a vyag, mêgem he xôn ob dô kidu tibed dì xomxo tibed ob viac he.

17 Mag xêyaa vin lec a dì kehe bêga nêbê a ob vông a diluhu vac yibên, nang dêc a ob kidi lec magviha nang.

18 Xomxo ti o tiyi wê ob hôm a xôn dì hi a xib ge lêm. Nge, aca va ob vông a diluhu vac yibên. Aca va xêkizêc tiyi wê a ob vông a la vac yibên ge, nang dêc aca va xêkizêc tiyi wê a ob kidi lec ge. Kiyang tige, Mag nêl vô a ên nêb a vông i vô nôn lec.”

19 He Yuda ngô Yesu kiyang tige om he hibu he mi le kidu yuu,

20 dì he tibeac nêl ên nêbê, “Xomxo tige vimwo nipaên dô vac nilô om vông i piyôp juda. Bêna lêcom xam ngô i vya?”

21 Lêc he ya nêl ên nêbê, “Xomxo wê vimwo nipaên dô vac he nilô ge, he ob nêl kiyang tibêge

lêm. Vimwo nipaên o tiyi wê ob vông xomxo ma tocên manôn i seac ge lêm.”

He Yuda yê Yesu tiyiên ma

²² Ge buc levac wê Yuda ob xovô buc wê he tax xumac ngibua Jelusalem ge. Buc tige lea yuu ningigooên,

²³ Mêd Yesu la Anutu xumac ngibua dì la vilee lec pêt myahipu ti wê he nêl King Solomon lê lec ge.

²⁴ Mêd Yuda ya la le vivac vô Yesu dì nêl vô i ên nêbê, “Ông vông xe nilôm la yuu dì obêc miłoc vô buc tina? Ông obêc Kîlisi ge od ông nêl ông kitong seac vô xe ên va.”

²⁵ Mêd Yesu nêl vô he ên nêbê, “A nêl vô xam pyap, lêc xam o vông i vin a lêm. Yuac vihati wê a vông lec Mag lê ge, nêl a kitong seac,

²⁶ lêc xam o vông i vin lêm, ên xam o tu bwoc sipsip wê a vông ge lêm.

²⁷ Sipsip wê a vông ge ngô a vyag dì a xovô he, dì he timu vô a vixag.

²⁸ A obêc vông he dô mavîha luta lêc luta dì he ob yib lêm, dì xomxo ti ob vô he vêl ên a vigêg lêm.

²⁹ Mag wê vông he vô a ge luu susu vihati vêl om xomxo ti o tiyi wê ob vô he vêl ên Mag vigêge lêm.

³⁰ Xii xôn Mag, nôn tibed.”

³¹ Mêd he Yuda hôm ngidax nêb ob nêx Yesu ya.

³² Lêc Yesu nêl vô he ên nêbê, “A hilung yuac niviha wê Mag vông ge tibeac vô xam. Om xam

wê yuac tina so lêc xam nêb xam ob nêx a ya ngîdaxê?”

³³ Lêc he Yuda nêl vô Yesu ên nêbê, “Xe ob nêx ông ya ngîdax ên yuac nivîha wê ông vông ge lêm. Nge, xe nêb xe ob nêx ông ên wê ông so vyam vô Anutu ge. Ên ông ge xomxo kibun ga ti, lêc ông nêb ông Anutu.”

³⁴ Mêd Yesu luu he vyac bêga ên nêbê, “Kiyang ti yêp vac xolac wê xam vông ge bêga nêbê, ‘A nêl ên a nêb xam ge Anutu.’

³⁵ Anutu nêl kiyang tige vô xomxo ilage, lêc nêb he Anutu. Di il xovô ên il nêbê xomxo ti o tiyi wê ob kitya Anutu vyac vêl ge lêm.

³⁶ Anutu nêb he Anutu, om bêna lêc xam nêl ên xam nêbê a so vyag vô Anutu ên wê a nêl ên a nêbê a Anutu nu ge? Ên a ga, Anutu vinoo a di vông a lam kibun.

³⁷ “A vôngên Anutu yuac obêc ma ge od xam o lêc vông i vin a vyag lêm.

³⁸ Lêc a mi vông yuac wê Mag vông ge, om xam obêc nêb vông i vin a vyag lêm ge od xam wê yuac wê a mi vông ge di vông i vin. Ên xam obêc vông i vin ge od xam obêc xovô bê Mag dô vac a nilôg di a dô vac Mag nilô.”

³⁹ Mêd xomxo tigee nêb ob hôm Yesu xôn lê, lêc Yesu vô he vigê vêl di loc mì la.

⁴⁰ Mêd Yesu lax mì la mia Jodan vilu ganê tii vac nang di la dô vac vigwe ti wê Jon lipac xomxo vac ilage.

⁴¹ Mêd xomxo tibeac la vô Yesu, di nêl ên nêbê, “Jon o vông do levac ya lêm, lêc kiyang vihati wê Jon nêl lec xomxo tige, kiyang nôn.”

42 Mêgem xomxo tibeac vac vîgwe tige, he vông i vin Yesu.

11

Lasalas yib

1 Xomxo ti lê nêbê Lasalas vông yidac mì yêp vac ben gê Betani. Betani ge Malia yuu li Mata ben.

2 Malia tige wê la too mia nivîfea nivîha lec Yesu vixa dì kitya ya nibavîluhu ge, lêc Malia li vux Lasalas vông yidac.

3 Om li vêx yuu ge vông kiyang la vô Yesu ên nêbê, “Apumtau, xomxo ti wê ông xêmyaa vin lec i ge vông yidac levac dì yêp.”

4 Yesu ngô kiyang tige dì nêl ên nêbê, “Yidac tige ob vông xomxo tige yib lêm. Nge, yidac tige vông, ên nêb ob vông Anutu lê i vô levac dì ob vông Anutu nu lê i vô levac êno.”

5 Yesu xêyaa vin lec Mata yuu li vêx dì Lasalas.

6 Yesu ngô wê yidac vông Lasalas ge, lêc dô vigwe wê dô vac ge tîyi buc yuu hixôn,

7 nang dêc nêl vô nue ngîvihi ên nêbê, “Il ob lax mì la Judia i tii vac nang.”

8 Lêc nue ngîvihi nêl vô i ên nêbê, “Xolac kehe, nyop ge, xomxo Yuda nêb ob nêx ông ya ngîdax, lêc ông nêb ông ob lax mì la vîgwe tige i tii vac nangê?”

9 Mêgem Yesu luu he vya ên nêbê, “Hiyôv manôn vîgê yuu dì tô mì la yuu yêp vô vîdiîen ti. Om xomxo ti obêc vîlee vô vîdiîen ge od ob mwoc lêm, ên xêseac linac lec kîbun.

¹⁰ Lêc obêc la vô bucên ge od ob mwoc, ên xêseac o linac vô i lêm.”

¹¹ Yesu nêl pyap, lêc nêl vô he nang ên nêbê, “Il lig Lasalas yêp, lêcom a ob la tipi vô i kidi lec.”

¹² Om Yesu nue ngivihi nêl ên nêbê, “Apumtau, ici va obêc yêp ge od obêc vô nivîha lec nang.”

¹³ Kiyang tige, Yesu nêl lec wê Lasalas yib ge, lêc he so ên he nêb mêt Yesu nêl ên nêb Lasalas vaci yêp.

¹⁴ Om Yesu nêl seac vô he ên nêbê, “Lasalas yib,

¹⁵ lêc a xêgyaa vô nivîha ên wê a o la dô hixôn i ge lêm, ên a xo xam ên a nêb xam vông i vin a. Om xam lam ên il ob la xê Lasalas.”

¹⁶ Mêt Tomas wê ta kô yuu li ngwe ked ge, nêl vô lie ngivihi ên nêbê, “Xam lam ên il xôn la xib hixôn Yesu.”

Yesu ge kidi lecên yuu maviha dôen kehe

¹⁷ Mêt Yesu loc mi la ên nêb ob la Betani, lêc ngô wê he lii Lasalas vac lôva di buc yuudiyuu la vêl ge.

¹⁸ Betani yêp kwabo vô Jelusalem tiyi xocbê 3 kilomita ge,

¹⁹ om xomxo Yuda tibeac lam yê Mata yuu Malia ên wê li Lasalas yib ge, ên he nêb he ob vông yuu nilô i vô viyin maên.

²⁰ Mêt Mata ngô wê Yesu val ge om mila vô i vac môp, di Malia dô vac xumac.

²¹ Mêt Mata nêl vô Yesu ên nêbê, “Apumtau, ông obêc dô ga ge od a lig yibê obêc ma.

²² Lêc a xovô ên a nêbê gwêbaga ông obêc kitaa susu ti vô Anutu ge od Anutu obêc vông i tiyi wê ông kitaa ge.”

²³ Mêd Yesu nêl vô i ên nêbê, “Lim tuc obêc kidi lec i tii vac nang.”

²⁴ Mêd Mata nêl vô i ên nêbê, “A xovô ên a nêbê obêc buc tîmuên wê xomxo vihati obêc kidi lec i tii vac ge od Lasalas ob kidi lec hixôn.”

²⁵ Om Yesu nêl vô i ên nêbê, “Kidi lecén yuu mavîha dôen kehe a. Xomxo wê vông i vin a ge he obêc yib lê, lêc obêc kidi lec mavîha.

²⁶ Dì xomxo vihati wê dô mavîha dì vông i vin a ge, he yibên obêc ma. Ông vông i vin kiyang tiga, me?”

²⁷ Mégem Mata nêl vô Yesu ên nêbê, “Apumtau, a vông i vin ên a nêbê ông ge Kîlisi. Dì ông Anutu nu, wê Anutu nêb ob vông ông lam kîbun ga ge.”

Yesu byag

²⁸ Mata nêl kiyang pyap dì la keac Malia lam dì lum nêl vô i ên nêbê, “Xolac kehe val, lêc nêb ông loc wê i.”

²⁹ Malia ngô kiyang tige mêt kidi lec lutibed dì la vô Yesu.

³⁰ Yesu gên o val viyangtôv lêm. Nge, gên le vac môp wê Mata mîla vô i ge.

³¹ Mêd he Yuda wê val ên nêb ob vông Malia yuu Mata nilô i vô niviha ge, he dô vac xumac lôma hixôn Malia dì yê wê Malia kidi lec lutibed dì la ge om he timu vô i vixa mî la, ên he xo ên he nêb mêt Malia ob la byag lec lôva.

³² Malia mîla vigwe wê Yesu val le ge dì yê Yesu, om mîla kwabo vô i dì yev vixa kitu vô dì nêl ên

nêbê, “Apumtau, ông obêc dô ga ge od a lig yibên obêc ma.”

³³ Yesu yê wê Malia he Yuda wê lam hixôn i ge byag ge, om Yesu yetac di nilô vô viyin mabu.

³⁴ Mêd kinêg vô he ên nêbê, “Xam lii Lasalas loc yêp tina?” Mêd he nêl ên nêbê, “Apumtau, lam wê.”

³⁵ Mêgem Yesu byag,

³⁶ om Yuda tigeel nêl ên nêbê, “Wê, xomxo tige xêyaa vin lec Lasalas luu vêl.”

³⁷ Lêc he ya nêl ên nêbê, “Xomxo tige vông xomxo ma tocên manôn seac, lêc mêd o tiyi wê ob ngidu Lasalas xôn ên yibên i ma ge lêmê?”

Yesu tipi vô Lasalas kidi lec maviha vac yibên

³⁸ Yesu nilô vô viyin levac di i mila vô lôva wê he lii Lasalas yêp vac ge. Lôva tige le vac ngidax di he lax ngidax ti le vac lôva mya xôn.

³⁹ Mêd Yesu nêl ên nêbê, “Hôm ngidax tige vêl.” Lêc yibên tyo li vêx Mata nêl ên nêbê, “Apumtau, Lasalas yib mi xe yev, di buc yuudiyuu lam la vêl, om nuhu tyip.”

⁴⁰ Lêc Yesu nêl vô i ên nêbê, “A nêl gwêba vô ông ên a nêbê ông obêc vông i vin ge od ông ob wê xêseac wê Anutu vông ge.”

⁴¹ Mêgem he hôm ngidax tige vêl di Yesu lax ma la kisii di nêl ên nêbê, “Mag, a hi vixag pec ên wê ông ngô kitaaên wê a vông ge.

⁴² Di a xovô ên a nêbê tiyi buc vihati ông vô ninyam vô a vyag, lêc a nêl kiyang tiga ên a nêb xomxo wê val le gae, he i ngô di vông i vin bê ông vông a lam.”

43 Yesu nêl bêge mêt tyuc vyac levac ên nêbê, “Lasalas, kidi lec mi lam.”

44 Mêgem Lasalas kidi lec dì lam vixun lêc lam hixôn nivimihi wê he viyum vigê yuu vixa vac ge dì nivimihi nipwo ti wê he viyum manôn vac ge hixôn, om Yesu nêl vô he ên nêbê, “Xam piwelac nivimihi vêl dì vông i loc.”

Yuda levac hilu kiyang pyap ên nêb ob hi Yesu i yib

(*Matyu 26:1-5; Mak 14:1-2; Luk 22:1-2*)

45 Yuda wê la vô Malia ge, he yê wê Yesu tipi vô Lasalas ge, om he tibeac vông i vin Yesu.

46 Lêc he ya la vô Palisi dì la nêl môp wê Yesu vông ge kitong vô he.

47 Mêgem Palisi hixôn xomxo levac wê mi si daa gee, he kitucma hixôn kaunsil vihati dì nêl vîma ên nêbê, “Il ob vông bêna? Ên xomxo tyo vông do levac tibeac,

48 om il obêc dixê ya madnôn dì i dô ge od obêc vông do levac ya hixôn dì xomxo vihati obêc vông i vin i, dì tibii Lom wê viac il ge obêc val kipê xumac ngibua wê il vông ge sea dì vông il vô nipaên hixôn.”

49 Lêc he ti lê nêbê Kaiapas wê tu xomxo daa sién nêl levac lec klismas tige nêl vô he ên nêbê, “Xam o xovô kiyang ti lêm,

50 dì xam o xovô môp wê ob vô niviha vô xam ge lêm. Xam ngô lê. Xomxo tibed obêc yib ên xomxo vihati ge od obêc vô niviha vô il dì tibii Lom ob lam kitya il vêl lêm.”

51 Kaiapas o nêl kiyang tige ya xovô ên wê ici va vông ge lêm. Nge, tu xomxo wê mi si daa gee

nên xomxo levac lec klismas tige om nêl kiyang bo tige seac lec Yesu wê ob yib ên he Yuda ge.

⁵² Lêc ob yib ên Yuda vaci lêm. Nge, ob yib ên kituc Anutu nue vihati wê dô vac vigwe vihati ge he lam dô kidu tibed.

⁵³ Vô buc tige Yuda hilu kiyang pyap nêb ob hi Yesu i yib.

⁵⁴ Om Yesu o la vîlee vac Yuda mahigun ti tii vac lêm. Nge, sea vigwe tige mi la vigwe ti lê nêbê Iplem wê yêp kwabo vô vigwe mahigun pileva ge, mêd Yesu he nue ngivîhi la dô vac vigwe tige.

⁵⁵ Buc levac wê Yuda ob xovô buc Pasova Isip ilage vô kwabo lec, om xomxo tibeac vac vigwe toto ge kituc la Jelusalem tax, ên nêb ob la viac he ên buc tige.

⁵⁶ Om he myag Yesu vac Anutu xumac ngîbua di nêl vîoma ên nêbê, "Xam xo bêna? Xam nêb Yesu ob yê buc tiga hixôn, me?"

⁵⁷ Xomxo levac wê mi si daa gee hixôn Palisi nêl kiyang pyap ên nêbê xomxo ti obêc xovô vigwe ti wê Yesu la dô vac ge od i lam nêl kitong vô he ên he ob la hôm Yesu xôn.

12

*Malia too mia nivivea niviha lec Yesu vixa
(Matyu 26:6-13; Mak 14:3-9)*

¹ Buc vigê vîlu di sec ti gên yêp di obêc buc Pasova, di Yesu lax mi la Betani wê tipi vô Lasalas kidi lec mavîha vac yibêng.

² Mêd he myêl yaêng vô Yesu, di Mata duu yaêng di Lasalas dô hixôn he wê ob ya yaêng hixôn Yesu ge.

³ Mêd Malia kô mia nivîvea nivîha vac butol ti. Mia tige he kisuu lec mone levac mabu. Mêd Malia kô mi la too lec Yesu vixa dî kitya ya nibavîluhu. Om mia nivîvea tige la pup vac xumac nilô.

⁴ Lêc Yesu nue ngivihi ti lê nêbê Judas Iskaliot wê ob vông Yesu vac tibii vevac vigê ge nêl ên nêbê,

⁵ “Bêna lêc il o vông mia tige mi tibii kisuu ya mone yul yon (K300) ên il vông vô tibii wê nê susu maên geê?”

⁶ Judas nêl bêge lêc o xo tibii wê nê susu maên ge lêc nêl kiyang tige lêm. Ên Judas ge tibii yôdac ti lê, lêc mi viac Yesu he nue ngivihi tin wê mone mi dô vac ge om mone wê he mi tung la vac tin ge Judas mi kô ya yôdac.

⁷ Lêc Yesu nêl vô i ên nêbê, “Vông vêx tige i dô, ên vông tixuuêñ lec buc wê he ob lipac mia nivîvea lec a nignivi dî yev a ge.

⁸ Xomxo wê nê susu maên ge ob dô hixôn xam buc dia, dî a ga, a ob dô hixôn xam buc dia lêm.”

Yuda levac hilu kiyang pyap nêb ob hi Lasalas i yib

⁹ Yuda tibeac ngô wê Yesu la dô Betani ge om he lam vô i, lêc he o lam nêb he ob yê Yesu vaci lêm. Nge, he nêb ob yê Lasalas wê Yesu tipi vô i kidi lec vac yibêñ ge hixôn.

¹⁰ Mêgem xomxo levac wê mi si daa gee hilu kiyang pyap ên nêb ob hi Lasalas i yib hixôn,

¹¹ ên Yuda tibeac xovô wê Lasalas kidi lec vac yibêñ ge om sea Yuda levac dî vông i vin Yesu.

*Yesu la Jelusalem tiyi xocbê xomxo levac ti
(Matyu 21:1-11; Mak 11:1-11; Luk 19:28-40)*

¹² Mêd vigwe viidiién titige xomxo tibeac wê lam dô ên nêb ob yê buc levac ge, he ngô wê Yesu ob mîla Jelusalem ge,

¹³ om he la kô xax lihi dî mîla vÔ Yesu vac môp dî tyuc hixôn nêbê,

“Il ob pîmil Anutu dî hi vixad i pec ên xomxo ti wê tu Apumtau manôn dî lam ge, ên i ge tu xomxo levac wê ob viac il Islel.”

¹⁴ Mêd Yesu la kô bwoc donki nu ti mi dô lec, tiyi xocbê kiyang wê yêp vac xolac bêga nêbê,

¹⁵ “Xam xomxo Saion, xam xona ên i ma. Xam wê lê. Xam xomxo levac wê ob viac xam ge dô lec bwoc donki nu ti mi val.”

¹⁶ VÔ buc tige Yesu nue ngivihi gên lungên kiyang tige kehe, lêc buc wê Yesu lax dô vac xêseac ge od he xo i lax lec kiyang tige wê yêp vac xolac ge dî xovô nêbê kiyang tige vÔ nôn lec vÔ Yesu.

¹⁷ Xomxo wê dô hixôn Yesu dî yê wê Yesu tipi vÔ Lasalas kidi vac lôva mi lam ge la nêl kiyang tige kitong vÔ xomxo tibeac.

¹⁸ Om xomxo tibeac ngô wê Yesu vÔng do levac tige om he mîla vÔ Yesu vac môp.

¹⁹ Mêd Palisi nêl vÔma ên nêbê, “Xam wê lê. Il nêd kiyang nôn ma, ên xomxo vîhati la timu vÔ Yesu.”

Glik ya nêb ob yê Yesu

²⁰ Xomxo tibeac la Jelusalem ên nêb ob la kitaâ vÔ Anutu lec buc ngibua tige lêc Glik ya la hixôn.

²¹ Om Glik tigee la vô Pilip wê ben Betsaida vac vigwe levac Galili ge, dì la nêl vô i ên nêbê, "Xomxo levac, xe ob xê Yesu."

²² Om Pilip la nêl vô Andlu, dì yuu la nêl vô Yesu.

²³ Lêc Yesu nêl vô yuu ên nêbê, "Buc wê Xomxo Nu ob kô lê levac ge vô kwabo lec pyap.

²⁴ A nêl hixôn nôn vô xam bê skom nôn ti obêc la vac kibun lêm ge od ob dô ya nôn tibed. Lêc obêc la dô vac kibun nilô ge od ob tyip mi vô nôn tibeac.

²⁵ Xomxo ti xêyaa obêc vin lec ici va ninivi ge od ninivi wê i vông ge obêc yib. Lêc xomxo ti obêc vông i vin Anutu dì yê ici va ninivi tiyi xocbê susu pileva gê kibun ga ge od obêc la dô maviha luta lêc luta.

²⁶ Xomxo ti obêc nêb vông yuac wê a vông ge od i lam timu vô a, ên vigwe wê a ob dô vac ge, a nuge yuac obêc dô hixôn a. Dì xomxo ti obêc vông yuac wê a vông ge od Mag obêc vông lê levac vô i.

Yesu nêl lec wê ob yux lec xax ge

²⁷ "Gwêbaga a nilôg vô viyin levac om a ob nêl bêna? A ob nêl bê 'Mag, ông vô viyin tiga vêl ên a'? Ma vêl, a ob nêl bêge lêm. Ên a lam ên a nêb a ob kô viyin tige.

²⁸ Mag, ông vông ông lêm i vô levac." Yesu nêl bêge mêd vyta ti lam gê lag puunê ên nêbê, "A vông a lêg vô levac pyap dì a ob vông i vô levac tii vac nang."

²⁹ Lêc xomxo wê le kwabo gee ngô vyta tige om he ya nêl ên nêbê, "Deac tug," dì he ya nêl ên nêbê, "Angela ti keac vô i."

³⁰ Lêc Yesu luu he vya ên nêbê, “Vya tige o lam vô a ên nêb a ngô lêm. Nge, lam ên nêb xam ngô.

³¹ Gwêbaga Anutu ob yaxên xomxo kibun ga nêñ kiyang dì ob tii Seten wê tu xomxo kibun ga nêñ levac ge i la vêl.

³² Gwêbaga a gên dô kibun, lêc buc wê a obêc yux lec xax ge od a ob dïdii xomxo vihati lam vô a.”

³³ Yesu nêl kiyang tige ên nêb ob nêl môt wê ob yib ge kehe kitong vô he.

³⁴ Mêd xomxo tigee luu i vya ên nêbê, “Xe ngô kiyang wê yêp vac xolac bêga nêbê Kilisi ob dô mavîha luta lêc luta. Bêna lêc ông nêb Xomxo Nu ob yux lec xaxê? Xomxo Nu ge letya?”

³⁵ Mêd Yesu nêl vô he ên nêbê, “Xêseac ob dô hixôn xam myabo tya. Om buc wê xêseac dô hixôn xam ge od xam loc vac xêseac, ên mapitoc i o lêc hivun xam xôn lêm. Ên xomxo ti obêc la vac mapitoc ge od ob lungên môt wê ob la vô ge.

³⁶ Om xam vông i vin xêseac wê dô hixôn xam ge, êdêc tu xêseac nue.” Yesu nêl kiyang tige pyap mêt sea he dì la xôpac ên he.

Yuda tibeac o vông i vin Yesu lêm

³⁷ Yesu vông do levac tibeac vô xomxo manôn mi he yê, lêc he o vông i vin i lêm.

³⁸ Om kiyang wê plopet Aisaia nêl ilage vô nôn lec. Kiyang tige yêp bêga nêbê,

“Apumtau, letya vông i vin kiyang wê xe nêl ge?

Apumtau hilung xêkizêc wê i vông ge lê, lêc letya vông i vin? Xomxo ti o vông i vin lêm.”

39 Xomxo tigee tiyiên ma wê ob vông i vin Yesu ge dì kehe yêp vac kiyang ngwe wê Aisaia kivuu bêga nêbê,

40 “Anutu vông he manôn toc dì vông he piyôp vô xêkizêc, om he manôn yêen ma dì he piyôp xovôôn kiyang ti ma, dì he o pilepac he bê Anutu ob vông he dô nivîha lêm.”

41 Aisaia yê xêseac wê Kilisi vông ge om nêl kiyang tige lec Kilisi vaci.

42 Mêgem Yuda levac, he tibeac vông i vin Yesu, lêc he xona ên Palisi om he o nêl vông vinên wê he vông ge kitong seac lêm, ên he xona ên wê Palisi obêc tii he vêl ên xumac lilo dì vông he la dô ninya ge.

43 Ên Yuda tigee xêyaa vin lec nêb xomxo i yê he nivîha, dì he o xovô nêbê Anutu i yê he nivîha lêm.

Yesu kiyang wê ob yaxêن xomxo ge

44 Yesu keac via levac yêp seac ên nêbê, “Xomxo ti obêc vông i vin a ge od o vông i vin aca va tibed lêm. Nge, vông i vin xomxo ti wê vông a lam ge hixôn.

45 Dì xomxo wê yê a ge od yê xomxo ngwe wê vông a lam ge hixôn.

46 A lam dô kibun ga hixôn xêseac, ên a nêb xomxo wê vông i vin a ge, he i o lêc dô vac mapitoc nang lêm.

47 Xomxo ti obêc ngô a kiyang lêc timu vôên obêc ma ge od a ob titô i lêm. Ên a o lam ên a nêb a ob yaxêن xomxo nêen kiyang lêm. Nge, a lam ên a nêb a ob hôm he lec.

48 Xomxo ti obêc vô nimi vô a dì ngôên a kiyang obêc ma ge od i nêñ wê ob yaxêñ i ge yêp, ên kiyang wê a nêl ge obêc yaxêñ i vô buc tîmuêñ.

49 Ên kiyang wê a nêl ge a o nêl ya xovôêñ wê a vông ge lêm. Nge, Mag wê vông a lam ge, ici va nêl kiyang vô a ên nêb a lam nêl seac.

50 Dì a xovô ên a nêbê kiyang wê Mag nêl ge ob vông xomxo dô maviha luta lêc luta, om kiyang wê a nêl ge a nêl vihati tiyi xocbê Mag nêl vô a ge.”

13

Yesu lipac nue ngivihi vixa

1 Buc Pasova vô kwabo lec, om Yesu xovô nêbê buc wê ob sea kibun dì lax mi la vô Ma ge val vô kwabo lec pyap. Yesu xêyaa vin lec nue wê dô kibun ga tiyi buc vihati dì i la tyip lec buc wê ob yib lec ge.

2 Vigwe huc mêd Yesu he nue ngivihi ya yaêñ mi dô. Lêc Seten vông xovôêñ vô Judas Iskaliot wê Saimon nu ge ên nêb i nêl Yesu kitong vô tibii vevac.

3 Yesu xovô nêbê Ma vông xêkizêc vô i pyap, dì xovô nêbê i lam vô Anutu dì obêc lax mi la vô Anutu i tii vac nang.

4 He gên diya, lêc Yesu kidi lec dì kwax nivimihi vêl dì hôm taul dì vêx lec,

5 mêd too mia vac pile levac ti dì la vô nue ngivihi toto dì la lipac he vixa dì kitya ya taul ti wê vêx lec i ge.

6 Mêd mîla vô Saimon Pita lêc Pita kinêg vô i ên nêbê, “Apumtau, ông ob lipac a vixag?”

⁷ Mêd Yesu luu i vya ên nêbê, “Gwêbaga ông lungên môp wê a vông ga, lêc timuên ge ông obêc xovô.”

⁸ Lêc Pita nêl vô i ên nêbê, “Tiyiên ma vêl wê ông ob lipac a vixag ge.” Mêd Yesu luu i vya ên nêbê, “A lipacên ông obêc ma ge od o tiyi wê ông ob dô hixôn a ge lêm.”

⁹ Om Pita nêl vô i ên nêbê, “Apumtau, obêc bêge ge od ông ob lipac a vixag pîleva lêm. Nge, ông lipac a vigêg yuu bagzub hixôn.”

¹⁰ Lêc Yesu nêl vô i ên nêbê, “Xomxo wê lipac mia pyap ge ob

lipac ninivi vihati tii vac lêm. Nge, ob lipac vixa pîleva, ên ninivi vihati vô paha lec. Dì xam ge, xam vô paha lec pyap, lêcom o xam vihati lêm.”

¹¹ Yesu xovô xomxo ti wê ob vông i la vac tibii vevac vigê ge om nêl ên nêbê, “Xam vô paha lec pyap, lêcom o xam vihati lêm.”

¹² Yesu lipac he vixa pyap mêt vinyum nivimihi lec nang dì lax dô dì kinêg vô he ên nêbê, “Môp wê a vông vô xam gwêbaga, xam xovô kehe, me?”

¹³ Xam mi nêl a ên xam nêb a xolac kehe dì a Apumtau, om xam nêl i la tiyi, ên a bêge mège.

¹⁴ A ga Apumtau dì a xolac kehe, lêc a lipac xam vixam, om xam êno, xam lipac lime vixa.

¹⁵ Gwêbaga a hilung môp vô xam ên a nêb xam vông i tiyi xocbê a vông vô xam ge.

¹⁶ A nêl hixôn nôn vô xam bêga bê xomxo yuac ti ob luu i xomxo levac vêl lêm, dì xomxo ti wê la nêl xomxo ngwe kiyang ge ob luu xomxo ti wê vông i la ge vêl lêm.

17 Xam obêc xovô kiyang tiga mi vông i tiyi ge od xam xêmyaa obêc vô niviha.

18 “Lêc a o nêl kiyang tiga lec xam vihati lêm. Xam wê a vinoo xam mi xam tu axe ge, a xovô xam pyap. Lêc kiyang wê yêp vac xolac ge ob vô nôn lec, kiyang wê nêl bêga nêbê, ‘Xomxo ti wê ya yaên hixôn a ge kô vixa lec kisii, nêb ob kê a.’

19 Kiyang tige gên o vô nôn lec lêm, lêc a nêb a ob nêl kitong vô xam tax, ên obêc vô nôn lec timuên ge od xam xovô bê a xomxo tyo.

20 A nêl hixôn nôn vô xam bê xomxo ti obêc hôm xomxo wê a vông he la ge lec niviha ge, od tiyi xocbê hôm a lec niviha hixôn, dì xomxo ti obêc hôm a lec niviha ge od tiyi xocbê hôm xomxo ti wê vông a lam ge lec niviha hixôn.”

Yesu nêl xomxo ti wê ob vông i vac tibii vevac vigê ge kitong

(Matyu 26:20-25; Mak 14:17-21; Luk 22:21-23)

21 Yesu nêl kiyang tige pyap mêd nilô vô viyin mabu dì i nêl kiyang seac vô he ên nêbê, “A nêl vixôhilôg nôn vô xam bêga bê xacxam ti obêc vông a vac tibii vevac vigê.”

22 Lêc Yesu nue ngivihi lungên kiyang tige kehe om yêma manôn, ên nêb mêd nêl kiyang tige lec letya?

23 A, Jon wê Yesu xêyaa vin lec a luu vêl ge, a dô kwabo vô Yesu,

24 om Saimon Pita nêx kwa vô a ên nêb a kinêg vô Yesu bê Yesu nêl kiyang tige lec letya?

25 Om a du mi la kwabo vô Yesu dì kinêg vô i ên nêbê, “Apumtau, ông nêl kiyang tige lec letya?”

26 Mêd Yesu nêl vô a ên nêbê, “Xomxo ti wê a ob tinyum blet vac mia mî vông vô ge, tyo tige mê.” Mêgem Yesu hôm blet ti dî tinyum vac mia dî vông vô Judas wê Saimon Iskaliot nu ge.

27 Judas hôm blet tige mî ya dî lutibed Seten la vac i nilô, mêt Yesu nêl vô Judas ên nêbê, “Môp wê ông nêb ông ob vông ge, ông vông lutibed.”

28 He wê dô lec tevol ge, ti o xovô kiyang wê Yesu nêl vô Judas ge kehe lêm.

29 He xovô ên he nêbê Judas mi viac tin wê he mone mi dô vac ge om he ya xo ên he nêb Yesu mêt nêl vô Judas nêb i loc kisuu yaên wê he ob ya lec buc levac ge, me nêb i loc vông mone vô tibii wê nêm mone maên ge.

30 Judas hôm blet tige mî ya vêl dî lop mî la vixun lutibed dî vigwe buc.

Yesu nêl xolac paha ti vô he

31 Judas la pyap mêt Yesu nêl ên nêbê, “Gwêbaga xêseac wê Xomxo Nu vông ge val le seac, dî Xomxo Nu vông xêseac wê Anutu vông ge val le seac hixôn.

32 Di Xomxo Nu obêc hilung xêseac wê Anutu vông ge od Anutu vaci ob hilung xêseac wê Xomxo Nu vông ge lutibed.

33 Xam nuge, a ob dô hixôn xam myabo tya, di xam obêc myag a, lêc kiyang wê a nêl vô he Yuda ge, a ob nêl vô xam hixôn bêga bê vigwe wê a ob la dô vac ge, xam ti o tiyi wê xam ob la vac ge lêm.

34 A ob nêl xolac paha ti vô xam bêga bê xam xêmyaa i vin lecma. A xêgyaa vin lec xam om

xam xêmyaa i vin lecma i tiyi xocbê a xêgyaa
vin lec xam ge.

³⁵ Èn xam xêmyaa obêc vin lecma ge od xomxo
vihati obêc xovô bê xam tu a nuge.”

Yesu nêl nêb Pita obêc yax i vun
(*Matyu 26:31-35; Mak 14:27-31; Luk 22:31-34*)

³⁶ Mêd Saimon Pita kinêg vô Yesu ên nêbê,
“Apumtau, ông ob la na?” Mêd Yesu luu i vya ên
nêbê, “Vigwe wê a ob la vac ge, gwêbaga o tiyi
wê ông ob timu vô a vixag ge lêm. Lêc timuên
ge ông obêc timu vô a vixag.”

³⁷ Om Pita nêl vô i ên nêbê, “Apumtau, bêna
lêc a o tiyi wê a ob timu vô ông gwêbaga lêmê?
A tiyi wê a ob xib ên ngidu ông xôn.”

³⁸ Lêc Yesu nêl vô i ên nêbê, “Ông nêb ông ob
wib ên ngidu a xônê? A nêl hixôn nôn vô ông
bê kokilêx obêc gên vô vya lêm dì ông ob yax a
vun lu yon.”

14

Yesu ge môt wê ob la vô Anutu ge

¹ Yesu nêl vô he ên nêbê, “Xam nilôm i o lêc vô
viyin lêm. Xam vông i vin Anutu, om xam vông
i vin a hixôn.

² Xumac wê Mag vông ge, nilô tibeac yêp. Obêc
ma ge od a obêc nêl kitong vô xam ilage lê. Lêc
yêp vixôhilôg, om a ob lax ên lax viac xam bom
wê xam obêc miла dô vac ge.

³ Dì a obêc viac pyap ge, od a ob lôm kô xam,
êن xam loc dô hixôn a vac vigwe wê a ob dô vac
ge.

⁴ Dì vigwe wê a ob la vac ge, xam xovô môp pyap.”

⁵ Lêc Tomas nêl vô Yesu ên nêbê, “Apumtau, vigwe wê ông ob la vac ge, ge xe lungên, om xe ob xovô môp tige bêna?”

⁶ Om Yesu nêl vô i ên nêbê, “A ga môp, dì a kiyang nôn kehe, dì a mavîha dôen kehe. Om xomxo ti obêc la vô Mag vô môp bangwe lêm, ên môp wê ob la vô Mag ge a tibed.

⁷ Xam obêc xovô a ge od xam obêc xovô Mag hixôn, dì gwêba lêc xam xovô i, ên xam wê i pyap.”

⁸ Mêd Pilip nêl vô i ên nêbê, “Apumtau, ông hilung mam vô xe dì obêc pyap.”

⁹ Lêc Yesu nêl vô i ên nêbê, “Pilip, a dô hixôn xam buc xuhu dia, lêc xam gên lungên a? Xomxo wê yê a ge yê Mag. Bêna lêc ông nêb a hilung Mag vô xamê?

¹⁰ Mêd ông gên o vông i vin bê a dô vac Mag nilô dì Mag dô vac a nilôg lêm, me? Kiyang wê a nêl vô xam ge, a o nêl ya xovôên wê a vông ge lêm. Nge, Mag wê dô vac a nilôg ge, a vông yuac wê i vông ge.

¹¹ Xam vông i vin bêga bê a dô vac Mag nilô dì Mag dô vac a nilôg. Lêc xam obêc vông i vin kiyang tige lêm ge od xam wê yuac wê a vông ge dì vông i vin.

¹² “A nêl vixôhilôg nôn vô xam bê xomxo wê vông i vin a ge ob vông do tiyi xocbê a mi vông ge, dì obêc vông do levac luu wê a vông ge vêl, kehe bêga nêbê a ob lax vô Mag.

¹³ Dì susu vihati wê xam ob kitaa lec a lêg ge a obêc vông i vô nôn lec, ên a ob vông xêseac wê Mag vông ge i yêp seac.

¹⁴ Om xam obêc kitaa susu ti lec a lêg ge od a obêc vông i vô nôn lec.

Yesu nêl nêb ob vông Myakîlôhô Ngîbua i lam

¹⁵ “Xam xêmyaa obêc vin lec a ge od xam obêc tîmu vô xolac wê a nêl ge.

¹⁶ Dì a obêc kitaa vô Mag dì Mag obêc vông xomxo ngwe i lam vô xam. Xomxo tige wê ob ngîdu xam xôn dì dô hixôn xam luta.

¹⁷ Ge Myakîlôhô Ngîbua wê ob nêl kiyang nôn, lêc xomxo kibun ga o tiyi wê ob kô i lec niviha ge lêm, ên he o xovô i lêm. Lêc xam xovô i pyap, ên mi dô hixôn xam dì obêc dô vac xam nilôm.

¹⁸ “A obêc sea xam dô tamaén xocbê xomxo pîbua ge lêm. Nge, a obêc lôm vô xam i tii vac.

¹⁹ Buc myabo tyá dì xomxo kibun ga ob yê a tii vac lêm, lêc xam ge, xam obêc wê a. A dô magvîha om xam êno obêc dô mamvîha.

²⁰ Obêc buc tige od xam obêc xovô bê a dô vac Mag nilô dì xam dô vac a nilôg, dì a dô vac xam nilôm.

²¹ Xomxo ti obêc ngô a kiyang dì viac niviha ge od xomxo tige xêyaa vin lec a, dì xomxo ti xêyaa obêc vin lec a ge od Mag xêyaa ob vin lec i dì a xêgyaa ob vin lec xomxo tige dì a obêc hilung a vô i.”

²² Yesu nêl bêge mêt Judas ngwe wê o Judas Iskaliot lêm ge nêl vô Yesu ên nêbê, “Apumtau, bêna lêc ông ob hilung ông vô xe dì ông ob hilung ông vô xomxo kibun ga vihati lêmê? Ge kehe bêna?”

23 Om Yesu luu i vya ên nêbê, “Xomxo ti xêyaa obêc vin lec a ge od obêc viac kiyang wê a nêl ge niviha, dì Mag xêyaa obêc vin lec xomxo tige dì xii Mag ob la dô hixôn i.

24 Lêc xomxo wê xêyaa o vin lec a lêm ge ob viac a kiyang niviha lêm. Dì kiyang wê xam ngô ge, o a kiyang lêm. Nge, Mag wê vông a lam ge, i kiyang.

25 “A gên dô hixôn xam om a nêl kiyang tiga vô xam.

26 Lêc xomxo ti dô wê ob ngidu xam xôn, ge Myakîlôhô Ngibua wê Mag ob vông i lam lec a lêg om obêc lam tixuu xam ya kiyang vihati, dì obêc vông xam piyôp yêp seac dì xam xovô kiyang vihati wê a nêl vô xam ge.

27 “A ob sea kiyang malehe i yêp vô xam, dì kiyang malehe wê a vông ge, a ob vông vô xam. Kiyang malehe wê a vông ge o tiyi xochê kiyang malehe wê xomxo kibun ga vông ge lêm. Om xam níbum i o lêc tipi dì xam xona lêm.

28 Xam ngô wê a nêl vô xam ên a nêbê, ‘A ob sea xam dì la, dêc a obêc vena vô xam i tii vac.’ Xam xêmyaa obêc vin lec a ge od xam xêmyaa obêc vô niviha ên wê a ob la vô Mag ge, ên Mag ge xomxo levac luu a vêl.

29 Kiyang ge gên o vô nôn lec lêm, lêc a nêl kitong vô xam tax, êdêc vô nôn lec timuên ge od xam vông i vin.

30 “A ob nêl kiyang tibeac ti vô xam lêm, ên Seten wê tu xomxo kibun ga nêl levac ge ob val, lêc o tiyi wê ob pwoo a pec ge lêm.

31 A nêb xomxo kibun ga vihati he i xovô bê a xêgyaa vin lec Mag, om a ob vông yuac vihati i

tìyi wê Mag nêl vô a ge. Om xam kidi lec ên il ob la.

15

Yesu ge tu xax wain nôn

¹ “A xax wain wê nôn ge, dì Mag ge wê tu yuac kehe.

² Om ngen wê a vông ge wê o vuac nôn lêm ge, Mag ob xoo vêl, dì ngen wê vuac ge, Mag ob yal mavigen vêl dì pityep ên i vuac nôn tibeac.

³ Kiyang wê a nêl vô xam ge vông xam vô paha lec pyap.

⁴ Xam dô vac a nilôg dì a ob dô vac xam nilôm. Ên xam obêc dô vac a nilôg lêm ge od xam ob vô nôn ti lêm, tìyi xocbê xax ngen obêc kitiv lec xax yatôv lêm ge od ob vuac nôn ti lêm.

⁵ “A ga xax wain, dì xam ge ngen. Om xomxo ti obêc dô vac a nilôg dì a ob dô vac i nilô ge od ob vuac nôn tibeac, lêc xam obêc sea a ge od xam o tìyi wê xam ob vông vuac niviha ti ge lêm.

⁶ Xomxo ti obêc dô vac a nilôg lêm ge od obêc tìyi xocbê xax ngen wê he hup vêl dì byêx i la dì i la mupac dì he nêx i la vac ngwax dì ngwax ya vêl ge.

⁷ “Xam obêc dô vac a nilôg dì a kiyang obêc yêp vac xam nilôm ge od susu wê xam xêmyaa vin lec mi xam kitaa ge od ob vô nôn lec vô xam.

⁸ Xam obêc vô nôn tibeac ge od ob vông Mag lê vô levac dì xam tu a nuge.

⁹ A xêgyaa vin lec xam tìyi xocbê Mag xêyaa vin lec a ge, om xam dô vac xêyaa vin lecên wê a vông ge nilô i tìyi buc vihati.

¹⁰ Xam obêc tîmu vô kiyang wê a nêl ge od xam ob dô vac xêyaa vin lecên wê a vông ge nilô, tiyi xocbê a tîmu vô kiyang wê Mag vông ge om a dô vac xêyaa vin lecên wê i vông ge nilô.

¹¹ A nêl kiyang tige vô xam ên a nêb xêyaa nivîha wê a vông ge i loc vô xam dî i pup vac xam nilôm.

¹² "Xolac wê a ob nêl vô xam ge bêga bê xam xêmyaa i vin lecma i tiyi xocbê a xêgyaa vin lec xam ge.

¹³ Xomxo ti obêc yib ên ngidu lie xôn ge od xêyaa vin lecên wê i vông ge levac luu vêl.

¹⁴ Dî xam obêc tîmu vô kiyang wê a nêl vô xam ge od xam tu a lige nôn.

¹⁵ Ilage a nêb xam tu a nuge yuac, lêc gwêbaga a ob nêl bê xam tu a lige. Ên nue yuac o xovô môp wê he nêl xomxo levac nêb ob vông ge lêm, lêcom xam xovô a kiyang vihati pyap, ên kiyang wê a ngô vô Mag ge, a nêl vihati vô xam mi xam xovô pyap.

¹⁶ "Xam o vinoo a lêm. Nge, a vinoo xam di vông yuac vô xam ên a nêb xam loc vô nôn tibeac di nôn wê xam vông ge i yêp luta. Dî xam obêc kitaa susu ti vô Mag lec a lêg ge od Mag obêc vông vô xam.

¹⁷ Om xolac wê a ob nêl vô xam ge bêga bê xam xêmyaa i vin lecma.

Xomxo kibun ga ob yê Yesu nue tiyiên ma

¹⁸ "Xomxo kibun ga obêc yê xam nipaên ge od xam xovô bêga bê he yê a nipaên tax.

¹⁹ Xam obêc tiyi xocbê tibii kibun ga ge od tibii kibun ga xêyaa obêc vin lec xam tiyi xocbê he lie

xam. Lêc xam o tiyi xochê tibii kibun ga lêm, ên a viñoo xam vac he mahigun ên a nêb xam o tu tibii kibun ga i tii vac lêm, om he xéyaa vô nipaên vô xam.

²⁰ Xam xovô lec kiyang wê a nêl vô xam ên a nêbê, 'Nu yuac ti ob nginoo xomxo levac wê i vông ge vêl lêm.' Tibii tii a, om obêc tii xam êno. Dì he obêc timu vô kiyang wê a nêl ge od obêc timu vô kiyang wê xam nêl ge hixôn.

²¹ Xomxo obêc vông vaxvax vô xam ên wê xam tu axe ge, ên he o xovô xomxo ti wê vông a lam ge lêm.

²² "A obêc lam nêl xolac vô he ilage lêm ge od he nêñ nipaên obêc yêp vô he lêm. Lêc a lam nêl xolac vô he, om o tiyi wê he ob yax nipaên wê he vông ge ti vun lêm.

²³ Xomxo ti obêc yê a nipaên ge od tiyi xochê yê Mag nipaên hixôn.

²⁴ Do levac wê xomxo ti o vông ilage lêm ge, a obêc vông vac he mahigun lêm ge od he nêñ nipaên obêc yêp vô he lêm. Lêc a lam vông mi he yê pyap, lêc he yê xii Mag nipaên.

²⁵ Môp wê he vông ge vông kiyang wê yêp vac xolac wê he vông ge ti vô nôn lec. Kiyang tige yêp bêga nêbê, 'He xéyaa vô myavinê vô a pisiv.'

²⁶ "Lêc xomxo wê ob ngidu xam xôn ge dô hixôn Mag om a obêc vông i lam vô xam. Ge Myakilôhô Ngibua wê ob nêl kiyang nôn, om ob lam nêl a kitong vô xam.

²⁷ Dì xam êno, xam ob nêl a kitong vô xomxo, ên xam dô hixôn a ilatikwê dì i val tyip gwêbaga hixôn.

16

¹ “A nêl kiyang tige vô xam ên a nêb xam o lêc sea vông vinên wê xam vông ge lêm.

² Ên tibii obêc tii xam vêl ên xumac liло dì vông xam la dô ninya, dì tîmuén he ob hi xam wib dì so nêb he vông yuac nivîha wê Anutu vông ge.

³ He ob vông môp tibêge, ên he lungê Mag dì lungê a.

⁴ A nêl kiyang tiga vô xam, ên a nêb viyin tibêge obêc tulec xam tîmuén ge od xam xovô bê a nêl kiyang vô xam pyap.

Yesu nêl lec yuac wê Myakilôhô Ngibua ob vông ge

“A o nêl kiyang tibêge vô xam ilage lêm, ên a dô hixôn xam,

⁵ lêc gwêbaga a ob lax vô xomxo ti wê vông a lam ge. Lêc xam ti o kinêg a lêm bê ‘Ông ob la na?’,

⁶ ên kiyang wê a nêl vô xam gwêbaga vông xam dô hixôn nilôm viyin.

⁷ Lêc a nêl hixôn nôn vô xam bê a obêc la ge od ob vô nivîha vô xam, ên a laên obêc ma ge od xomxo wê ob ngidu xam xôn ge valên obêc ma. Lêc a obêc la ge od a ob vông i lam vô xam.

⁸ Dì Myakilôhô Ngibua obêc val ge od ob nêl xomxo kibun ga nêن nipaên kitong dì ob nêl môp nivîha kitong dì ob nêl môp wê Anutu ob yaxêñ xomxo nêñ kiyang ge kitong.

⁹ Om ob nêl xomxo nêñ nipaên kitong bêga bê he o vông i vin a lêm.

¹⁰ Dì ob nêl môp nivîha kitong, ên a ob lax vô Mag dì xam ob wê a tii vac lêm.

¹¹ Dì ob nêl kiyang wê Anutu ob yaxêن xomxo nêl kiyang ge kitong bêga bê Seten wê tu xomxo kibun ga nêl levac ge, Anutu yaxêن i nêl kiyang pyap om obêc vông myaviwen vô i.

¹² “A kiyang tibeac yêp wê a nêb a ob nêl vô xam ge, lêc xam o tiyi wê xam ob ngô ge lêm.

¹³ Lêc Myakilôhô Ngibua wê kiyang nôn kehe ge obêc val ge od obêc didii xam la vac kiyang nôn. Lêc ob nêl ya xovôên wê ici va vông ge lêm. Nge, ob nêl kiyang wê ngô ge kitong vô xam, dì ob nêl kiyang yuu môt wê ob val timuên ge kitong vô xam hixôn.

¹⁴ Myakilôhô Ngibua ob vông a lêg i vô levac, ên ob kô kiyang wê a vông ge mi lam nêl kitong vô xam.

¹⁵ Kiyang vihati wê Mag vông ge tu axe pyap om a nêl vô xam bê Myakilôhô Ngibua ob kô kiyang vô a dì nêl kitong vô xam.

Nilô viyin obêc pilepac dì tu xêyaa niviha

¹⁶ “Buc myabo tya dì xam wêen a obêc ma, dì obêc buc myabo tya nang, lêc xam obêc wê a tii vac.”

¹⁷ Yesu nue ngivihi ya kinêg vîma ên nêbê, “Kiyang tige kehe bêna? Ên nêl ên nêbê buc myabo tya dì il xêen i obêc ma, dì buc myabo tya nang lêc il obêc xê i tii vac. Dì nêl ên nêb i ob la vô Ma.

¹⁸ Om via wê nêl ên nêbê buc myabo tya, ge kehe bêna? Il lungêن kiyang tyo kehe.”

¹⁹ Yesu xovô wê he nêb ob kinêg kiyang vô i ge, om nêl vô he ên nêbê, “Kiyang wê a nêl ên a nêbê buc myabo tya dì xam wêen a obêc ma,

dì buc myabo tya nang lêc xam obêc wê a tii vac nang, xam dîkinêgma lec kiyang tige mê?

²⁰ A nêl vixôhîlôg nôn vô xam bê xam obêc byag nôn, lêc tibii wê o vông i vin lêm ge ob dô hixôn xêyaa nivîha. Xam obêc dô hixôn nilôm viyin lê, lêc nilôm viyin obêc pilepac dì vông xam nilôm vô nivîha.

²¹ Obêc vô kwabo lec wê vêx ti nu obêc yubac ge od vêx tige dô hixôn viyin ên xovô nêbê buc wê ob yaxêñ myavinê ge vô kwabo lec, lêc nu obêc yubac vêl ge od ob xovô myavinê tii vac lêm. Nge, ob dô hixôn xêyaa nivîha ên wê nu tige yubac vêl ge.

²² Om gwêbaga xam dô hixôn nilôm viyin, lêc a obêc xê xam tii vac nang, om xam ob dô hixôn xêmyaa nivîha yang, dì xomxo ti o tiyi wê ob vô xêyaa nivîha tige vêl ên xam ge lêm.

²³ Obêc vô buc timuên ge xam obêc kinêg kiyang ti vô a i tii vac nang lêm. A nêl hixôn nôn vô xam bê xam obêc kitaa susu ti vô Mag lec a lêg ge od obêc vông vô xam.

²⁴ Ilage xam o kitaa susu ti lec a lêg lêm, om xam obêc kitaa ge od xam ob kô nôn dì xêmyaa obêc vô nivîha yang.

Yesu pwoo nipaén kibun ga pec

²⁵ “A nêl kiyang tige vô xam tiyi xocbê kiyang pilepacên. Lêc obêc timuên ge od a ob nêl kiyang pilepacên ti i tii vac vô xam lêm. Nge, a ob nêl Mag kehe i yêp seac vô xam.

²⁶ Vô buc tige xam obêc kitaa vô Anutu lec a lêg. A o nêl vô xam bê aca va ob kitaa vô Mag ên i ngidu xam xôn lêm,

²⁷ ên Mag vaci xêyaa vin lec xam ên wê xam xêmyaa vin lec a dì xam vông i vin ên xam nêbê a dô hixôn Mag léc lam ge.

²⁸ Ilage a dô hixôn Mag léc a sea Mag dì lam kibun, dì gwêbaga a ob sea kibun dì lax mi la vô Mag i tii vac.”

²⁹ Mêd nue ngivihi nêl vô i ên nêbê, “Gwêbaga ông nêl kiyang yêp seac dì ông o nêl kiyang pilepacên lêm.

³⁰ Om gwêbaga xe xovô ên xe nêbê ông xovô kiyang vihati pyap om ông o bin dì xomxo kinêg ông tax lêm. Om xe xovô ên xe nêbê ông dô hixôn Anutu léc lam.”

³¹ Mêd Yesu luu he vyâ ên nêbê, “Gwêbaga xam vông i vin a mê?

³² Xam ngô le. Buc vô kwabo lec pyap om tiibii ob tii xam sea dì xam toto ge ob la bom bom dì aca va ob dô tamaên. Lêcom obêc aca va lêm, ên Mag dô hixôn a.

³³ A nêl kiyang tiga vô xam ên a nêb xam dô vac a nilôg hixôn kiyang malehe. Xam obêc tulec viyin gê kibun ga, léc xam nilôm i nivîha, ên a pwoo nipaên kibun ga pec pyap.”

17

Yesu kitaa vô Anutu nêb i ngidu nue ngivihi xôn

¹ Yesu nêl kiyang tige pyap dì manôn la kisii dì i nêl ên nêbê, “Mag, buc tyo val pyap, om ông vông a lêg i vô levac, êdêc a vông ông lêm i vô levac.

² Èn ông vông xomxo vihati la vac a kwa ngîbi ên ông nêb a vông he wê ông vinoo nêb he i tu axe ge vihati i dô mavîha luta lêc luta.

³ Dì mavîha luta dôen kehe bêga nêbê xomxo ob xovô ông bê ông Anutu nôn tibed vixôhilôg, dì ob xovô Yesu Kilisi wê ông vông i lam ge.

⁴ A hilung xêseac wê ông vông ge gê kîbun ga, dì yuac vihati wê ông nêb a vông ge, a vông i la tiyi.

⁵ Mag, ilage wê kîbun gên ma ge od a dô hixôn ông vac xêseac, om gwêbaga a nêb ông vông xêseac tige vô a i tii vac nang.

⁶ “A nêl ông lêm kitong vô xomxo wê ông vinoo nêb he tu axe gê kîbun ga. He ge ông nume, dì ông vông he vô a. He viac ông kiyang nivîha,

⁷ dì gwêbaga he xovô ên he nêbê kiyang vihati wê ông vông vô a ge, lam vô ông.

⁸ Èn kiyang wê ông nêl vô a ge, a nêl kitong vô he mi he vông i vin. Dì he xovô vixôhilôg nôn ên he nêbê a dô hixôn ông lêc lam, dì he vông i vin ên he nêbê ông vông a lam.

⁹ “Om a kitaa lec he. A o kitaa lec xomxo kîbun ga vihati lêm. Nge, a kitaa ên xomxo wê ông vinoo nêb he i tu axe ge, ên he tu ông nume pyap.

¹⁰ Xomxo vihati wê tu a nuge ge tu ông nume, dì ông nume vihati tu a nuge. Dì môt wê he vông ge vông a lêg vô levac.

¹¹ A ob dô kîbun ga i tii vac lêm. Nge, a ob loc vô ông. Dom he ge he ob dô kîbun ga. Mag, ông ngîbua, om ông viac he ên he i dô vac ông lêm ti wê ông vông vô a ge nilô, dì he i dô tibed tiyi xocbê u tibed ge.

12 Buc wê a dô hixôn he ge a viac he di he dô vac ông lêm ti wê ông vông vô a ge. A viac he niviha om he ti ob la xôa ma lêm. Léc xomxo tibed ob kô myaviwen mi la xôa ma, ên kiyang wê yêp vac xolac ge i vô nôn lec.

13 Gwêbaga a ob lôc vô ông, di a nêl kiyang tige gê kibun ga, ên a nêb xêyaa niviha wê a vông ge i yêp vac he nilô.

14 “A nêl ông kiyang vô he mi he vông i vin om tibii kibun ga yê he nipaên, ên xomxo vông vinên kehe o kibun ga lêm, tiyi xocbê a kehe o kibun ga lêm.

15 A o kitaa ông bê ông kô he vêl ên kibun ga lêm. Nge, a kitaa ông ên a nêb ông viac he ên xomxo nipaên Seten.

16 He kehe o kibun ga lêm, tiyi xocbê a kehe o kibun ga lêm.

17 Ông vông he i tu ngibua ya kiyang nôn. Ên kiyang wê ông vông ge, kiyang nôn.

18 Ông vông a lam dô vac xomxo kibun ga mahigun, om a vông he kô a kiyang mi la vac xomxo mahigun éno bêge.

19 A vông a diluhu vô ông ên he, ên a nêb he i tu nume ngibua nôn.

20 “Léc a o kitaa ên xomxo tigee vaci lêm. Nge, a kitaa ên tibii wê ob ngô he kiyang di vông i vin a hixôn ge.

21 Mag, a nêb xomxo tigee vihati, he i dô tibed. Ên ông dô vac a nilôg di a dô vac ông nilôm, om a nêb he i dô vac u nilôd, ên xomxo kibun ga he i yê di xovô bê ông vông a lam.

22 Xêseac wê ông vông ge, a vông vô he ên a nêb he vihati i dô tibed, tiyi xocbê u dô tibed ge.

23 A dô vac he nilô di ông dô vac a nilôg, om a nêb he i dô nôn tibed, ên xomxo kibun ga he i yê di xovô bê ông vông a lam, di he i xovô bê ông xêmyaa vin lec he tiyi xocbê ông xêmyaa vin lec a ge.

24 “Mag, ông vinoo xomxo tigee nêb he i tu axe om a nêb he i dô hixôn a vac vigwe wê a ob dô vac ge, ên he i yê xêseac wê a vông ge. Vô buc wê kibun gên ma ge, ông xêmyaa vin lec a om ông vông xêseac tige vô a.

25 Mag, ông xomxo bôbac. Xomxo kibun ga lungên ông, lêc a xovô ông, di xomxo tigee xovô nêbê ông vông a lam.

26 A nêl ông lêm kitong vô he di a ob nêl i tii vac vô he, ên môp wê ông xêmyaa vin lec a ge i yêp vac he nilô di a dô vac he nilô hixôn.”

18

*Judas vông Yesu vac tibii vevac vigê
(Matyu 26:47-56; Mak 14:43-50; Luk 22:47-53)*

1 Yesu kitaa pyap mêd la hixôn nue ngivihi mi he la mia Kidlon vilu ganê di la vac yuac ti wê yevêxax vac ge.

2 Lêc Judas ti wê nêl Yesu kitong vô tibii vevac ge xovô vigwe tige, ên Yesu he nue ngivihi mi kitucma vac vigwe tige tiyi buc tibeac.

3 Om Judas kô tibii vevac Lom kidu ti di kô xêhipu wê xomxo levac daa sién hixôn he Palisi vông ge mi he la, mêd he dii ngwax di kilê susu vevac di mila vac vigwe tige.

4 Yesu xovô môp wê he ob vông vô i ge vihati pyap om la kwabo vô he dì kinêg vô he ên nêbê, “Xam myag letya?”

5 Mêd he nêl vô i ên nêbê, “Xe myag Yesu Nasalet.” Om Yesu nêl vô he ên nêbê, “A ga mê.” Judas wê nêb ob vông Yesu vac he vigê ge le hixôn he.

6 Yesu nêl ên nêbê, “A ga xomxo tyo” mêt xomxo tigee du mi lax ya nimi di vixog sea mi la yêp kibun.

7 Mêd Yesu kinêg vô he tii vac ên nêbê, “Xam myag letya?” Mêd he nêl vô i ên nêbê, “Yesu Nasalet.”

8 Mêd Yesu nêl vô he ên nêbê, “A nêl vô xam gwêba ên a nêb a ga mê, om xam obêc myag a ge od xam vông a nuge i loc vêl lê.”

9 Yesu nêl kiyang tige ên nêb kiyang wê nêl ilage i vô nôn lec, kiyang ti wê nêl ên nêbê, “Xomxo wê ông vînôo ên ông nêb he i tu axe ge, a o sea ti mi i la dô xel lêm.”

10 Mêlêc Saimon Pita kô yipac ti om tul vêl ên ninivi dì sev xomxo levac wê mi si daa ge nu yuac ti ninya vîlu hiyôv la vêl.

Nu yuac tige lê nêbê Malkas.

11 Mêd Yesu nêl vô Pita ên nêbê, “Hoo yipac i lôc vac ninivi. Mia kîlin wê Mag vông vô a ge, mêt a numên ob ma?”

He kô Yesu mi la vô Anas

12 Tibii vevac tigee hixôn xomxo levac ti wê viac he ge dì xêhipu wê he Yuda vông ge he hôm Yesu xôn dì ku xôn

¹³ dì kô mi la tax vô Anas wê Kaiapas yen ge. Kaiapas ge wê tu xomxo daa sién nén levac lec klismas tige.

¹⁴ Kaiapas ge wê nél vô he Yuda ilage ên nêbê, “Xomxo tibed obêc yib ên ngidu xomxo vihati xôn ge od obêc nivîha.”

Pita yax Yesu vun

(*Matyu 26:69-70; Mak 14:66-68; Luk 22:55-57*)

¹⁵ Saimon Pita yuu li ngivihi ngwe, yuu la vô Yesu vixa. Xomxo wê mi si daa gee nén xomxo levac xovô nu ngivihi ngwe ge, om nu ngivihi tige la xenac lôma hixôn Yesu vac xomxo levac tige ben

¹⁶ dom Pita le vixun. Om nu ngivihi ngwe wê xovôxomxo levac tige lôm nél vô vêx ti wê viac vuayen ge om kô Pita mi lam vac xenac lôma.

¹⁷ Mêd vêx tige nél vô Pita ên nêbê, “Ông ge mêd xomxo tiga nue ngivihi ti?” Lêc Pita nél vô i ên nêbê, “Ma, a o tu i nue ngivihi ti lêm.”

¹⁸ Vigwe vô ningigooên om nue yuac hixôn xêhipu vev ngwax mi nyuu, dì Pita la le hixôn mi he nyuu ngwax.

Xomxo daa sién nén levac kinêg kiyang vô Yesu

(*Matyu 26:59-66; Mak 14:55-64; Luk 22:66-71*)

¹⁹ Xomxo ti wê tu xomxo daa sién nén levac ge kinêg Yesu lec nue ngivihi dì kinêg kiyang wê mi nél vô xomxo ge.

²⁰ Om Yesu nél vô i ên nêbê, “Kiyang wê a mi nél ge, ge a nél i yêp seac vô xomxo vihati. Tiyi buc tibeac a la nél kiyang vac Yuda xumac lilo dì a nél vac Anutu xumac ngibua wê Yuda

tibeac lam mi kitucma vac ge, dì a o nêl kiyang ti xôpacên lêm.

²¹ Bêna lêc ông kinêg kiyang vô a? Ông kinêg vô xomxo wê ngô kiyang gee bêc a nêl kiyang vatya vô he. Ên he xovô kiyang wê a nêl vô he ge.”

²² Yesu nêl kiyang tige dì xêhipu wê le ge ti lam pitap Yesu lia dì nêl vô i ên nêbê, “Ông ob nêl kiyang tibêge vô xomxo levac wê mi si daa ge lêmê.”

²³ Lêc Yesu nêl vô i ên nêbê, “A obêc nêl kiyang ti so ge od ông nêl kiyang tige bê kiyang tige so. Lêc kiyang wê a nêl ge obêc nôn ge, od bêna lêc ông hi a pileva?”

²⁴ Yihi gên dô lec Yesu vigê dì Anas vông i la vô Kaiapas wê tu xomxo daa sién nêl levac ge.

Pita yax Yesu vun tii vac

(Matyu 26:71-75; Mak 14:69-72; Luk 22:58-62)

²⁵ Pita nyuu ngwax mi le, lêc xomxo tigee kinêg vô i ên nêbê, “Ông ge xomxo tige nue ngîvihi ti?” Lêc Pita nêl ên nêbê, “A o i nue ngîvihi ti lêm.”

²⁶ Mêd xomxo ti wê tu xomxo daa sién nêl levac ge, nue yuac ti dô. Nu yuac tige lie ti wê Pita sev ninya lihi vêl ge om nu yuac tige nêl vô Pita ên nêbê, “A xê ông dô hixôn i vac yuac lôma.”

²⁷ Lêc Pita yax Yesu vun tii vac dì lutibed kokilêx vô via.

Yesu la le vô gavman levac Pailat manôn

(Matyu 27:1-2,11-14; Mak 15:1-5; Luk 23:1-5)

²⁸ Vô pitoc yang he sea Kaiapas ben di kô Yesu mi la gavman levac ben, lêc he Yuda nêb ob la xumac lôma hixôn lêm, ên he xona nêb he obêc la vac tibii wê o Yuda lêm ge ben ge od ob pwoo he xolac vac di o tiyi wê he ob ya vîzid Pasova ge lêm.

²⁹ Om gavman levac Pailat lam vîxun vô he di kinêg vô he ên nêbê, “Xam ob vông kiyang vô xomxo tiga lec kiyang tina?”

³⁰ Om he nêl vô i ên nêbê, “Xomxo tige vôngên nipaên obêc ma ge od xe ob kô mi lam vô ông lêm.”

³¹ Mêd Pailat nêl vô he ên nêbê, “Om xam kô mi loc di loc yaxê i tiyi xocbê xolac wê xam vông ge.” Lêc he Yuda nêl vô Pailat ên nêbê, “Xam Lom vîbu xe ên xam nêbê o tiyi wê xe ob hi xomxo ti i yib ge lêm.”

³² Ilage Yesu nêl môt wê tibii ob hi i yib ge om kiyang wê he Yuda nêl ge vông kiyang wê Yesu nêl ge vô nôn lec.

³³ Mêd Pailat lax vac ben di keac Yesu la vô i, di kinêg i ên nêbê, “Ông ge king wê he Yuda vông ge, me?”

³⁴ Lêc Yesu luu i vya ên nêbê, “Ôcông va xovô kiyang tige lêc kinêg, me xomxo ya nêl a kitong vô ông?”

³⁵ Mêd Pailat nêl vô i ên nêbê, “Bêna lêc ông kinêg kiyang tiga vô a? A o Yuda ti lêm. Ông lime Yuda hixôn xomxo levac wê mi si daa gee wê he kô ông mi lam vô a. Om ông vô va lê?”

³⁶ Lêc Yesu nêl vô i ên nêbê, “He wê la vac a kwa ngîbi di a tu he nêñ king ge, kehe o yêp gê kibun ga lêm. Ên kehe obêc yêp kibun ga ge od

a nuge obêc vông vevac kisuu a lec ên nêb he Yuda i o lêc hôm a xôn lêm. Lêc o bêge lêm, ên môp wê a tu he nêng king ge, o yêp gê kibun ga lêm.”

³⁷ Om Pailat kinêg vô i ên nêbê, “Om ông ge king ti?” Mêd Yesu nêl vô Pailat ên nêbê, “Ôcông va nêb a king. A lam yubac gê kibun ga dì kehe bêga nêbê a ob nêl kiyang nôn i yêp seac vô xomxo. Dì xomxo wê kiyang nôn yêp vac he nilô ge wê ngô a vyag.”

³⁸ Lêc Pailat kinêg vô Yesu ên nêbê, “Kiyang nôn ge vatya?”

*Pailat nêl ên nêb he i tul Yesu lec xax pola
(Matyu 27:15-31; Mak 15:6-20; Luk 23:13-25)*

Pailat nêl bêge mêd lop mi lôm vixun vô he Yuda dì nêl vô he ên nêbê, “A o tulec kiyang ti lec xomxo tiga lêm.

³⁹ Lêc môp wê xam vông ge mi yêp bêga nêbê buc Pasova ge a mi piwelac xomxo ti dì vông i loc vô xam. Om xam nêb a piwelac king wê xam Yuda vông ge vêl, me?”

⁴⁰ Lêc he tyuc vyac levac ên nêbê, “O xomxo tige lêm. Nge, ông vông Balabas i lôm vô xe.” Balabas ge wê mi hi xomxo dì vun he susu ge ti.

19

¹ Mêd Pailat nêl dì nue vevac kô Yesu mi la pisa i ya yihi.

² Mêd tibii vevac tigee buu kipomac yin dì tung lec Yesu bazub dì kô ngakwi hi tiyi xocbê king mi vinyum ge mi la vinyum lec Yesu,

³ mêt he la le vô i manôn dì nêl vô ên nêbê, “Ông king wê Yuda vông ge, ông dô nimviha.” He nêl bêge dì pitap i lia.

⁴ Mêt Pailat lop mi lôm vixun tii vac dì nêl vô he Yuda ên nêbê, “Xam ngô lê. A ob vông xomxo tige i lôm vô xam ên xam xovô bê a o tulec kiyang ti lec i lêm.”

⁵ Mêt Yesu lop mi lam vixun, lêc kipomac yin wê he buu ge dô lec bazub dì i vinyum ngakwi hi wê king vông ge lec. Om Pailat nêl vô xomxo tige i lêm, “Xam wê xomxo tinê.”

⁶ Mêt xomxo levac wê mi si daa gee hixôn xêhiwu yê Yesu dì tyuc vya levac nêbê, “Tul i lec xax pola. Tul i lec xax pola.” Mêt Pailat nêl vô he ên nêbê, “Om xacxam va kô i mi loc tul lec xax, ên a o tulec soën ti vô i lêm.”

⁷ Mêt he Yuda nêl vô i ên nêbê, “Xolac wê xe vông ge ti yêp bêga nêbê xomxo tige ob yib, ên yong i ên nêbê i Anutu nu.”

⁸ Pailat ngô kiyang wê he nêl ge dì xona mabu,

⁹ dì lax vac ben xumac lôma dì kinêg vô Yesu ên nêbê, “Ông vac vigwe tina?” Lêc Yesu vô myapilihi vô i.

¹⁰ Om Pailat nêl vô i ên nêbê, “Bêna lêc ông o nêl kiyang ti vô a lêmê? Xêkizêc wê a vông ge tiyi wê a ob piwelac ông vêl, dì xêkizêc wê a vông ge tiyi wê he ob tul ông lec xax. Lêc mêt ông o xovô tige lêm?”

¹¹ Lêc Yesu nêl vô i ên nêbê, “Anutu lag puunê obêc vông xêkizêc vô ông lêm ge od ông o tiyi wê ông ob vông susu ti vô a lêm. Om xomxo ti wê vông a vac ông vigêm ge, nipaên wê i vông ge levac mabu luu nipaên wê ông vông ge vêl.”

12 Pailat ngô kiyang tige mêt myag môp wê nêb ob piwelac Yesu vêl ge. Lêc he Yuda tyuc ên nêbê, “Ông obêc piwelac i vêl ge od ông o timu vô kiyang wê king Sisa vông ge lêm, ên xomxo ti obêc nêb i king ge od xomxo tige kô i lec vô Sisa.”

13 Pailat ngô kiyang tige mêt kô Yesu mi la vixun di lax dô lec sia wê xomxo mi dô lec di titô xomxo nêb kiyang ge. Vac he Yuda via, he nêl vigwe tige lê nêbê Gabata, di kehe bêga nêbê pêt ngidax.

14 Vô buc tige he Yuda viac he ên vizid Pasova wê he ob ya titige mêt hiyôv tyip kitôn di Pailat nêl vô he Yuda ên nêbê, “Xam wê king wê xam vông ge lê.”

15 Lêc he tyuc ên nêbê, “Xam kô i mi loc vêl, di loc hi i lec xax pola.” Mêt Pailat kinêg vô he ên nêbê, “Xam nêb a tul king wê xam vông ge lec xax pola, me?” Mêt xomxo levac wê mi si daa gee nêl vô i ên nêbê, “King wê xe vông ge, Sisa tibed di king ngwe o dô hixôn lêm.”

16 Om Pailat vông Yesu la vac he vigê ên nêb he i tul i lec xax pola.

He hi Yesu lec xax pola

(Matyu 27:32-44; Mak 15:21-32; Luk 23:26-43)

17 Mêgem he kô Yesu mi la, mêt Yesu kîlê xax pola wê he ob hi i lec ge di sea vigwe Jelusalem di mila vigwe ti wê he nêl lê vac Yuda via nêbê Golgota, kehe bêga nêbê bazub len.

18 Mêt he tul Yesu lec xax pola vac vigwe tige, di tul tibii yuu lec xax hixôn Yesu, om Yesu yux

vac mahigun di tibii yuuo ge, ngwe yux vilu di ngwe yux vilu.

19 Mêd Pailat kivuu kiyang bo ti di tul lec xax hixôn. Kiyang tige nêl bêga nêbê, “YESU NASALET, KING WÊ HE YUDA VÔNG GE.”

20 Vigwe wê he hi Yesu lec xax ge yêp kwabo vô Jelusalem om xomxo tibeac kitong kiyang tige, ên Pailat kivuu vac Yuda via di Lom via di Glik via.

21 Mêgem Yuda levac wê mi si daa gee nêl vô Pailat ên nêbê, “Letya nêb ông kivuu bê king wê xe Yuda vông ge? Ông kivuu bêga bê xomxo tiga vaci nêl ên nêb i king wê Yuda vông ge.”

22 Lêc Pailat nêl vô he ên nêbê, “Kiyang wê a kivuu pyap ge ob yêp ya wê a kivuu ge.”

23 Tibii vevac tul Yesu lec xax pyap mêd kô i ngakwi di tung i dô kidu yuudiyuu di titang vîma di toto kô. Dom ngakwi dia wê i vông ge o duuên tiyi xochê siot yuu ngakwi baba lêm. Nge, duuên vac kwa di i la tô lec vixa.

24 Om tibii vevac nêl vîma ên nêbê, “Il ob lêx nivimihi tige lêm, om il ob tide mi xé bêc letya ob kô.” He nêl bêge om kiyang ti wê yêp vac kipihac xolac ge vô nôn lec, kiyang wê nêl bêga nêbê,

“He titang a ngakwi tiyi he di he tide nêb he tina wê ob kô ngakwi dia wê a vông ge.”

Tibii vevac vông môt tibêge.

25 Vêx yuudiyuu le vac Yesu xax pola ngibi, Yesu ta yuu li vêx, di Malia wê Klopas vinê ge yuu Malia Makdala.

²⁶ Mêd Yesu yê wê ta le ge, dì a Jon, wê Yesu xêyaa vin lec a ge, a le hixôn om Yesu nêl vô ta ên nêbê, “Tag, wê. Ông num le ge.”

²⁷ Nang dêc nêl vô a ên nêbê, “Wê, tam le ge.” Mêgem buc tige a kô Yesu ta mi i la dô hixôn a vac xumac wê a vông ge.

Yesu yib

(*Matyu 27:45-56; Mak 15:33-41; Luk 23:44-49*)

²⁸ Tige pyap mêd Yesu xovô nêbê yuac vihati pyap, om nêl ên nêbê, “A ob num mia.” Yesu nêl bêge om kiyang bo ti wê

yêp vac kipihac xolac ge vô nôn lec.

²⁹ Mia kilin le vac dêg om he kô myamîlumac wê le vac gwec nilô ge dì tinyum vac mia kilin dì kilax vac xax ti dì hôm la kisii vô Yesu mya.

³⁰ Yesu num mia kilin tige pyap dì nêl ên nêbê, “Pyap mëga.” Nêl dì kwa too dì i yib.

Tibii vevac kitiv Yesu vac byeac

³¹ Buc tige, buc wê he Yuda ob viac he ên Pasova titige, ên Pasova ge da levac wê nginoo vêl ge, om he nêb xomxo ninivi i o yux lec xax pola vô buc levac lêm. Om he la nêl vô Pailat nêb tibii i loc hi he vixa i pec ên he i yib lutibed ên he ob kwax vêl.

³² Om tibii vevac la hi tibii yuu wê he hi lec xax hixôn Yesu ge vixa pec.

³³ Dì he yê Yesu lêc yib om he o hi Yesu vixa pec lêm.

³⁴ Lêc tibii vevac ti kitiv Yesu vac byeac dì hi yuu mia lam lutibed.

35 A Jon, a xê tige lec magnôn om a nêl kitong ên a nêb xam êno vông i vin. Kiyang wê a nêl ge kiyang nôn, dì aca va xovô bêga bê kiyang tige nôn vixôhilôg.

36 Môp wê tibii vevac vông ge vông kiyang wê yêp vac kipihac xolac ge bo ti vô nôn lec, kiyang wê yêp bêga nêbê, “I len ti pecên obêc ma.”

37 Dì kiyang ngwe yêp bêga nêbê, “Xomxo ob yê manôn lec xomxo ti wê he kitiv i ge.”

*He lii Yesu vac lôva wê le vac ngidax ge
(Matyu 27:57-61; Mak 15:42-47; Luk 23:50-56)*

38 Pyap mêd Josep wê ben Alimatia ge la kitaâ Pailat ên nêb ob kô Yesu ninîvi mi la yev. Josep ge vông i vin Yesu lêc o nêl kitong seac lêm, ên xona ên he Yuda. Mêd Pailat tyuc lec nêb Josep i kô Yesu ninîvi om Josep la kwax Yesu ninîvi vêl ên xax.

39 Mêd Nikodimas ti wê la vô Yesu vô bucênilage la hixôn, om kô xax myaluc wê nivîfea niviha ge yuu dì pilepac yuu xôn. Myaluc tige viyin mabu tiyi xocbê 30 kilo.

40 Mêd yuu kô Yesu ninîvi dì viyum vac nivîmîhi hixôn susu nivîfea tige, tiyi xocbê môp wê Yuda mi vông vô xomxo yibêng.

41 Yuac ti yêp kwabo vô vigwe ti wê he hi Yesu yib vac ge. Dì lôva wê he kiiden vac ngidax ên nêb ob lii xomxo yibêng vac ge ti yêp vac yuac tige mahigun, lêc he gên o lii yibêng ti la vac lêm.

42 Buc tige, buc wê Yuda ob viac he ên sabat titige, dì lôva tige yêp kwabo om yuu kô Yesu ninîvi mi la lii vac lôva tyo.

20

*Yesu kidi lec vac yibêñ
(Matyu 28:1-8; Mak 16:1-8; Luk 24:1-12)*

¹ Da pitoc yang, Malia wê ben Makdala ge loc mi la lôva, lêc yê wê ngidax titêc la ninya vêl ên lôva mya ge.

² Om tup mi lax vô Saimon Pita yuu li ngivihi ngwe wê Yesu xêyaa vin lec i ge dì nêl vô yuu ên nêbê, “He kô Apumtau vac lôva dì xe lungên vigwe wê he la lii vac ge.”

³ Mêd Pita yuu li ngivihi ngweo la nêb ob la yê vac lôva.

⁴ Yuu tup, lêc li ngivihi ngwe ge luu Pita vêl dì mila le vô lôva tax,

⁵ om kilong lôva nilô lêc yê nivimihi wê viyumên Yesu ninivi vac ge diyêp, lêc o la vac lôva nilô lêm.

⁶ Mêd Saimon Pita mila timuên dì la vac lôva nilô mi la yê nivimihi pileva wê diyêp ge,

⁷ dì yê nivimihi ti wê he viyum Yesu bazub vac ge lêc o dô hixôn nivimihi wê he viyum Yesu nôn vac ge lêm. Nge, nivimihi tige buuên dì i la dô viyonêñ.

⁸ Nang dêc nu ngivihi ngwe wê mila lôva tax ge la vac lôva nilô dì la yê om vông i vin.

⁹ Lêc kiyang wê yêp vac kipihac xolac ên nêbê Yesu ob kidi lec vac yibêñ ge, he gên o xovô lêm.

¹⁰ Mêd nu ngivihi yuu ge lax mi la ben.

*Malia wê ben Makdala ge yê Yesu
(Mak 16:9-11)*

¹¹ Malia le kwabo vô lôva nîvi dì byag. Byag dì kilong lôva nilô,

¹² lêc yê angela wê vinyum ngakwi kwem ge yuu dô lec vigwe wê Yesu ninivi yêp lec ge, ngwe dô vô bazub dì ngwe dô vô vixa.

¹³ Mêd yuu nêl vô Malia ên nêbê, “Ông byag ên vatya?” Om Malia nêl vô yuu ên nêbê, “He kô a Apumtau vêl dì a lungên vigwe wê he la lii vac ge.”

¹⁴ Malia nêl bêge mêt pilepac i, lêc yê wê Yesu le ge, lêc o xovô bê ge Yesu lêm.

¹⁵ Mêd Yesu nêl vô i ên nêbê, “Vêx, ông byag ên vatya? Ông myag letya?” Malia xo nêb mêt Yesu ge xomxo ti wê mi viac vigwe tige om nêl vô i ên nêbê, “Ông obêc kô xomxo tige ninivi mi la ge od ông nêl vigwe ti wê ông la lii vac ge kitong vô a, ên a ob la kô mi lôm.”

¹⁶ Mêd Yesu nêl vô i ên nêbê, “Malia.” Mêd Malia pilepac i dì nêl vô Yesu vac Yuda vyax bêga ên nêbê, “Labonai.” Kehe bêga nêbê xolac kehe.

¹⁷ Mêd Yesu nêl vô i ên nêbê, “Le i lêc vyax vigê lec a lêm, ên a gên o lec mi lax vô Mag lêm. Om ông lôc vô a lige di nêl vô he bê a ob lec mi lax vô a Mag dì xam Mam, dì a ob lax vô a Anutu dì xam Anutu.”

¹⁸ Mêgem Malia Makdala lax nêl vô Yesu nue ngivihi ên nêbê, “A xê Apumtau,” dì nêl kiyang wê Yesu nêl vô i ge kitong vô he.

Yesu hilung i vô nue ngivihi

(Matyu 28:16-20; Mak 16:14-18; Luk 24:36-49)

¹⁹ Da bucêng ge Yesu nue ngivihi kitucma mi dô, lêc he xona ên Yuda om he tung xumac lec dì dô xumac lôma, mêt Yesu mila le vac he mahigun dì nêl vô he ên nêbê, “Xam nilôm i vô nivîha.”

²⁰ Yesu nêl kiyang tige dì hilung vîgê yuu byeac piyaha vô he om he xêyaa vô niviha ên wê he yê Apumtau ge.

²¹ Mêd Yesu nêl tii vac vô he ên nêbê, “Xam nilôm i vô niviha. Mag vông a lam om a ob vông xam êno loc.”

²² Yesu nêl kiyang tige mêd vê myakilôhô lec he dì nêl vô he ên nêbê, “Xam kô Myakilôhô Ngibua.

²³ Xam obêc kitya xomxo nêl nipaên vêl ge od ob la vêl, lêc xam obêc hôm xomxo nêl nipaên xôn ge od ob yêp vô he.”

Tomas yê Yesu

²⁴ Buc wê Yesu mîla hilung i vô nue ngîvihi ge, nue ngîvihi ti lê nêbê Tomas wê ta kô yuu li ngwe ked ge o dô hixôn he lêm.

²⁵ Om lie ngîvihi ya nêl vô i ên nêbê, “Xe xê Apumtau.” Lêc Tomas nêl vô he ên nêbê, “A obêc xê bilem myayen wê le vac vîgê ge, dì vông vîgêg la vac, dì vông vîgêg la vac byeac lêm ge od a ob vông i vin lêm.”

²⁶ Da ti la vêl dêc nue ngîvihi kitucma mi dô vac xumac tii vac dì Tomas dô hixôn he. He dô dì tung xumac lec, lêc Yesu val le vac he mahigun dì nêl vô he ên nêbê, “Xam nilôm i vô niviha.”

²⁷ Mêd nêl vô Tomas ên nêbê, “Titô vîgêm i lam dì wê a vîgêg ga, dì vông vîgêm i lam vac a byeac. Ông nilôm i o vông yuu lêm. Nge, ông vông i vin.”

²⁸ Mêd Tomas nêl vô i ên nêbê, “Ông ge a Apumtau, dì ông a Anutu.”

²⁹ Mêd Yesu nêl vô i ên nêbê, “Ông wê a om ông vông i vin mê. Lêc xomxo wê o yê a lêm lêc he vông i vin ge, he ob dô hixôn xêyaa nivîha.”

Jon kivuu kipihac tiga lec kehe va?

³⁰ Yesu vông do levac tibeac hixôn mi nue ngîvihi yê, lêc a o kivuu vihati vac kipihac tiga lêm.

³¹ Lêc kiyang wê a kivuu vac kipihac ga, a kivuu ên a nêb xam vông i vin bê Yesu ge Kîlisi ti wê Anutu vông i lam ge dì i Anutu nu, ên xam obêc vông i vin ge od xam ob dô mamviha ên wê xam vông i vin Yesu ge.

21

Yesu hilung i vô nue ngîvihi vigê vilu dì sec yuu

¹ Yesu dô dì buc mahigun ti lêc hilung i vô nue ngîvihi tii vac gê mia luaên Taibilias, om kiyang yêp bêga nêbê

² Saimon Pita dêc Tomas wê ta kô yuu li ngwe ked ge, dì Nataniel wê ben Kena vac vigwe levac Galili ge, dì Sebedi nu yuu, dì nue ngîvihi yuu hixôn, he xôn dô.

³ Mêd Saimon Pita nêl vô he ên nêbê, “A ob la hi pis.” Lêc he nêl vô i ên nêbê, “Il xôn ob la.” Om he la lec dipac dì la tung leac vac mia vô bucên dia tige, lêc he o hi pis ti lêm.

⁴ Mêd vigwe vidiiên Yesu le vô mia ninya lêc nue ngîvihi o xovô bê ge Yesu lêm.

⁵ Mêd Yesu kinêg vô he ên nêbê, “Xam nuge, xam kô pis ya?” Lêc he nêl vô i ên nêbê, “Ma vêl, xe o kô pis ti lêm.”

⁶ Mêd Yesu nêl vô he ên nêbê, “Xam nêx leac i loc vac mia vô dipac vîlu wê viégêm hiyôv ge od xam ob tulec pis.” Om he nêx leac la vac mia dì pis tîbeac hiwocên vac leac, om o tiyi wê he ob pul leac i lôm ge lêm.

⁷ Mêd nu ngivihi ti wê Yesu xêyaa vin lec i ge nêl vô Pita ên nêbê, “GeApumtau.” Pita kwax siot vêl dì vông yuac mi dô, lêc ngô vyâ wê nêbê ge Apumtau, om vinyum ngakwi lec dì sox la vac mia dì la vô Yesu.

⁸ Dì nue ngivihi gên dô lec dipac om dipac dîdii leac hixôn pis dì he lam. He lam dia tya tiyi 90 mita dì mîla vô mia ninya.

⁹ He lop vêl ên dipac, lêc yê wê ngwax dîtum dì pis yêp lec dì blet dô hixôn.

¹⁰ Mêd Yesu nêl vô he ên nêbê, “Pis wê xam hi gwêbaga, xam kô ya mi lam.”

¹¹ Om Saimon Pita lec lax lec dipac nang dì he dîdii leac lam mia ninya. Pis tigeet tîbeac hiwocên tiyi 153, lêc leac o tip lêm.

¹² Mêd Yesu nêl vô he ên nêbê, “Xam lam wa yaén.” Nue ngivihi xona om he ti o kinêg Yesu bê i ge letya, lêc he xovô nêbê ge Apumtau.

¹³ Mêd Yesu la hôm blet dì vông vô he, dêc vông pis hixôn vô he.

¹⁴ Yesu kidi lec vac yibêñ dì hilung i vô nue ngivihi lu tige wê vông yon ge.

Yesu nêl kiyang vô Pita

¹⁵ He ya pyap mêd Yesu kinêg vô Saimon Pita ên nêbê, “Saimon, Jon nu, ông xêmyaa vin lec a luu he baba vêl, me?” Mêd Pita nêl vô i ên nêbê, “Apumtau, ông xovô ên ông nêbê a xêgyaa vin

lec ông.” Om Yesu nêl vô Pita ên nêbê, “Ông viac sipsip nue wê a vông ge.”

¹⁶ Mêd Yesu kînêg vô i lu ngwe hixôn ên nêbê, “Saimon, Jon nu, ông xêmyaa vin lec a, me?” Mêd Pita nêl vô i ên nêbê, “Apumtau, ông xovô ên ông nêbê a xêgyaa vin lec ông.” Om Yesu nêl vô i ên nêbê, “Ông viac sipsip wê a vông ge.”

¹⁷ Nang dêc Yesu kînêg vô Pita lu ti wê vông yon ge ên nêbê, “Saimon, Jon nu, ông xêmyaa vin lec a, me?” Pita nilô vô viyin ên wê Yesu kînêg i lu yon ên nêbê, “Ông xêmyaa vin lec a, me?” Om nêl vô Yesu ên nêbê, “Apumtau, ông xovô kiyang vihati dì ông xovô ên ông nêbê a xêgyaa vin lec ông.” Om Yesu nêl vô i ên nêbê, “Ông viac sipsip wê a vông ge.”

¹⁸ “A nêl hixôn nôn vô ông bê buc wê ông gên ngivihi ge, ôcông va vêx ông let dì la vigwe wê ông nêb ông ob la ge, lêc obêc timuêñ wê ông ob vô kipwoc ge od ông ob titô vigêm la kisii di xomxo ngwe ob vêx let lec ông dì kô ông mi la vac vigwe wê ông nêb ông la vacêñ obêc ma ge.”

¹⁹ Yesu nêl kiyang tige ên nêb ob nêl Pita nêñ môp wê ob yib dì vông Anutu lê i vô levac ge kitong. Nêl kiyang tige pyap dêc nêl vô Pita ên nêbê, “Lam timu vô a vixag.”

Kiyang lec nue ngivihi ti wê Yesu xêyaa vin lec i luu vêl ge

²⁰ Pita pilepac i dì yê wê li ngivihi ngwe wê Yesu xêyaa vin lec i luu vêl ge timu vô yuu vixa mi val. Li ngivihi tige wê ilage he xôn dô mi ya, lêc du mi la vô Yesu dì kînêg nêbê, “Apumtau, letya ob vông ông vac tibii vevac vigê?”

21 Pita yê li ngivihi tige om kînêg vô Yesu ên nêbê, “Apumtau, xomxo tige ob dô bêna?”

22 Léc Yesu nêl vô Pita ên nêbê, “A obêc nêb xomxo tige i dô mavîha dî a vena lê ge od ge yêp vô a. Om ông lam tîmu vô a vixag.”

23 Mêd kiyang la vô Yesu nue vihati bêga nêbê nu ngivihi tige ob yib lêm. Léc kiyang wê nêl nêbê ob yib lêm ge, Yesu o nêl bêge lêm. Nge, nêl ên nêbê, “A obêc nêb i dô mavîha dî a vena lê ge od ge yêp vô a.”

24 A, Jon, wê a nêl kiyang tige vihati kehe kitong dî kîvuu vac kîpihac ga, dî xe xovô ên xe nêbê kiyang wê a nêl dî kîvuu ge nôn.

25 Yesu vông môp tîbeac hixôn om a xo ên a nêbê xomxo obêc kîvuu toto ge vihati vac kîpihac ge od kîpihac tigee obêc tîbeac hîwocên hîvun vigwe kîbun ga ma vêl.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 28 Dec 2024 from source files dated 31 Aug 2023

3d2c844d-4bc8-590b-bbf2-3a5fcfd1f7ad8